

INFO



Informativni časopis Općine Novi Grad Sarajevo | maj 2019. godina | Broj 23



Škola u Dobroševićima - Odbojka za djevojčice

Prva sportska takmičenja u novim dvoranama



Škola na Aneksu - Košarka za dječake

Adrenalin park u centru "Safet Zajko"


Budžet Općine za 2019. godinu 41.825.000 KM

Novo igralište u dvorištu vrtića "Dječiji grad"














Savršen dan!



CENTAR SAFET ZAJKO
REKREACIJA, SPORT I EDUKACIJA

SADRŽAJ:

	Općinsko vijeće	4
	Kabinet načelnika	8
	Privreda	11
	Infrastruktura	21
	Obrazovanje	42
	Kultura	49
	Sport	56
	Obilježavanja	62
	Ostale vijesti	70

VAŽNIJI TELEFONI I E-MAIL ADRESE

Služba za poslove Općinskog vijeća

033 291-130, fax. 033 291-271
vijece@novigradsarajevo.ba

Služba kabineta Općinskog načelnika

033 291-100 033 291-103; fax. 033 291-278
infonovigrad@novigradsarajevo.ba
ngsa@bih.net.ba
aminapress@novigradsarajevo.ba

Služba za privredu i lokalni ekonomski razvoj

033 291-122
privreda@novigradsarajevo.ba

Služba za urbanizam, imovinskoppravne, geodetske poslove i katastar nekretnina

033 291-120; fax. 033 291-224
urbanizam@novigradsarajevo.ba
033 291-279
imovinska@novigradsarajevo.ba

Služba za opću upravu

033 291-233;
opcauprava@novigradsarajevo.ba
maticniured@novigradsarajevo.ba
cern@novigradsarajevo.ba

Služba za obrazovanje, kulturu i sport

033 291 117
033 291 281; fax. 291 170
obrazovanjeirazvoj@novigradsarajevo.ba

Služba za boračka pitanja, rad, socijalna pitanja i zdravstvo

291-237; fax.291-164
boracka@novigradsarajevo.ba
033 291-173; fax. 291-173
radisocijalnapitanja@novigradsarajevo.ba
291-306; fax.291-281

Služba za investicije i infrastrukturu

033 291-116
investicijeikomunalno@novigradsarajevo.ba

Služba za finansije

291-234; fax.291-319
finansije@novigradsarajevo.ba
ngsafin@bih.net.ba

Služba za zajedničke poslove

033 291-107
cz@novigradsarajevo.ba

Služba civilne zaštite

033 291-114
sacira@novigradsarajevo.ba

Služba za lokalnu samoupravu

033 291-344
mz@novigradsarajevo.ba

Služba za inspeksijske poslove

inspekcija@novigradsarajevo.ba

Pravobranilaštvo Općine Novi Grad Sarajevo

033 291-162
pravobranilastvo@novigradsarajevo.ba



Telefoni za hitne intervencije:

HIGIJENSKI SERVIS

++ 387 61 22 99 40

DEŽURNI INSPEKTOR

++ 387 61 22 99 49

IMPRESUM:

IZDAVAČ: Općina Novi Grad Sarajevo
Tel.+387 33 291 100, 291-313
E-mail: ngsa@bih.net.ba
www.novigradsarajevo.ba

UREĐIVAČKI KOLEGIJ: Amina Vatreš-Nezirević
DTP Nihad Spahić

KOMEMORATIVNA SJEDNICA U OPĆINI NOVI GRAD

Porodice, rodbina i kolege oprostili se od Adisa Šehovića i Davora Vujinovića



U prepunoj multimedijalnoj sali Općine Novi Grad Sarajevo, 29. oktobra 2018. godine, od brutalno ubijenih policajaca Četvrte PU Novi Grad Adisa Šehovića i Davora Vujinovića vrlo emotivno oprostili su se mnogobrojna rodbina, prijatelji, kolege i predstavnici svih nivoa vlasti. Samo jecaji i plač prekidali su tišinu u sali, gdje su prisutni učenjem Fatihe i minutom šutnje odali počast Adisu i Davoru.

O ubijenim policijskim službenicima govorili su Mevludin Halilović, policijski komesar MUP-a Kantona Sarajevo, Nusret Selimović, načelnik Četvrte PU Novi Grad, Elfin Mujezin i Azra Kurić, radne kolege i Mirza Hadžiabdić u ime Sindikata policije Kantona Sarajevo. Policijski komesar Mevludin Halilović kazao je da je gubitak dvoje policijskih službenika nenadoknadiv za porodice Šehović i Vujinović, kao i gubitak za sarajevsku policiju u čijim redovima su njih dvojica davali maksimalan doprinos obavljajući sve svoje poslove i zadatke predano i profesionalno.

Neprežaljani i nezamjenjivi

„U Četvrtoj PU, u cijelom MUP-u KS će ostati neprežaljani i nezamjenjivi, sve svoje vrline pokazivali su svojim djelima, a ne ispraznim riječima. Svoje živote dali su za izgradnju boljeg društva, čime se potvrđuje trajna vrijednost njihove žrtve. Svako od nas u

službi pamtiće ih po brojnim, kako lijepim, tako i teškim zajedničkim trenucima“, kazao je Nusret Selimović.

Potresen i u suzama, svojih kolega prisjetio se Elfin Mujezin, koji je jedva smogao snage da nešto kaže o njima. „Dvojici hrabrih momaka pretpostavljeni sam bio osam godina. Radili su pošteno i iskreno, i u dobru, i u zlu, i u radosti, i u žalosti. Nisam nikada imao nikakvih problema s mojim momcima. Da li bilo hladno, toplo, teško ili lako, oni su bili tu. Radili su svoje zadatke. Kao rukovodilac smjene, pokušavao sam Adisa u nekim stvarima sprečavati da obavlja poslove za koje je mislio da može sam. Dvije, tri noći prije pogibije, susreo se sa tim kriminalcima, došao je u Stanicu kazavši: „Šefe, ja ću im stati ukraj“. Međutim, desilo se suprotno.

Osam godina zajedno

Prisutnima se obratila i njihova kolegica Azra, koja je kazala da je nedavno došla u PU Novi Grad, i da su je oni prihvatili kao rođenu sestru. „Šta reći o Adisu? On je bio veliki veseljak, bio je pošten, hrabar, dobar otac, dobar sin i dobar muž. Ništa mu nije bilo mrsko da uradi. Prvi je bio na svakoj intervenciji. A Davor – Dačo dolazio je na posao minutu prije sedam, ako bi kojim slučajem došao deset minuta do sedam,

šalili smo se između sebe da ćemo tog dana imati puno posla. Moje kolege iz smjene radili su osam godina zajedno, disali su jednom dušom, prolazili smo sve skupa. Želim poručiti njihovim porodicama i majkama da trebaju da budu ponosni, jer su to bili policajci „jedan po jedan“, a mi im obećavamo da ih nikada nećemo zaboraviti“, poručila je Azra.



Budžet Općine Novi Grad Sarajevo za 2019. godinu 41.825.000 KM



Nakon višesatne rasprave, vijećnici Općinskog vijeća Novi Grad Sarajevo usvojili su, 27. decembra 2018. godine budžet za 2019. godinu u iznosu od 41.825.000 KM.

Sastavni dio budžeta čine vrlo važni projekti koji se odnose na poboljšanje uslova života građana općine Novi Grad Sarajevo. Osim kapitalnih projekata i projekata iz oblasti cestovne infrastrukture, izgradnje vodovodne i kanalizacione mreže koje se svake godine izdvajaju najveća budžetska sredstva, u budžetu za iduću godinu planirana su 2,5 miliona KM za rješavanje problema saobraćaja u stanju mirovanja.

Planirano je da se projektuju etažne garaže u B i C-fazi Alipašinog Polja, a u idućoj godini osigurana su sredstva za izgradnju jedne sa oko 280 parking mjesta, dok bi u 2020. bila izgrađena i druga. Pored garaža, značajna finansijska sredstva bit će uložena u parkinge. To padrazumijeva sanaciju znatnog dijela rasvjete na parkinzima koji su u velikoj mjeri mračni, što predstavlja jedan od problema, i horizontalne signalizacije na parkinzima koji se nalaze u velikim stambenim naseljima.

Osim toga, radit će se i proširenje parkinga i sanacija oštećenja na njima. Pored toga, u saradnji sa Policijskom upravom, krenut će se u postavljanje video-nadzora na jednom broju parkinga, gdje građani izbjegavaju parkirati svoja vozila na mjestima predviđenim za to, jer su loše osvijetljeni ili se boje za sigurnost svojih automobila.

Proširenje ulice Džemala Bijedića

Nastaviće se i izgradnja sportske dvorane pored OŠ „Umihana Čuvidina“, gdje su radovi u toku, kao i druga faza izgradnje bazena

na Dobrinji. Uskoro će početi rekonstrukcija i proširenje ulice Džemala Bijedića koja će se raditi zajedno sa Direkcijom za puteve Kantona Sarajevo, a krenut će se sa prvom dionicom od 9. tansverzale pa do raskrsnice kod preduzeća „Gras“, gdje se dionica treba u potpunosti rekonstruisati i proširiti sa dvije na četiri kolovozne trake.

Socijalni program

Također će biti nastavljena realizacija programa podsticaja privredi, zatim socijalnih programa od pomoći teško oboljelim građanima, pomoći nezaposlenim porodiljama, za koje Općina mjesečno izdvaja dodatnih po 50 KM, zatim podrška porodicama koje dobiju blizance, treće i svako naredno dijete, pomoć za vantjelesnu oplodnju i sl.

Okolo pola miliona konvertibilnih maraka planirano je za stipendiranje učenika i studenata, a nastavit će se i sa podrškom sportu i kulturnim projektima na području općine Novi Grad Sarajevo.

300.000 KM Četvrtoj PU Novi Grad

Uvećana su i sredstva kojima Općina pomaže rad Četvrte PU, obzirom da se u oktobru ove godine dogodio tragičan događaj u kojem su živote izgubila dvojica policijskih službenika. Grant Četvrtoj PU sa 50.000 KM povećan je na 300.000 KM. To će biti doprinos ove lokalne zajednice da se najveći dio ulaza i izlaza iz grada, prometnih raskrsnica na području naše općine stavi pod video - nadzor.



Uspostavljen fond za pomoć porodicama ubijenih policajaca Adisa Šehovića i Davora Vujinovića

Općina Novi Grad Sarajevo uspostavila je poseban fond za pomoć porodicama policajaca Četvrte policijske uprave Novi Grad Adisa Šehovića i Davora Vujinovića, koji su ubijeni na službenoj dužnosti 26. oktobra prošle godine u naselju Alipašino Polje.

Općinsko vijeće Općine Novi Grad je na vanrednoj sjednici održanoj povodom tog tragičnog događaja donijelo zaključak da se formira poseban fond za pomoć roditeljima ubijenih policijskih službenika i suprugama sa djecom. Poseban fond za pomoć porodicama Šehović i Vujinović uspostavljen je krajem prošle godine, a isplata novčanih sredstava u iznosu od po 500 KM mjesečno roditeljima i 500 KM suprugama sa djecom počela je od januara ove godine.

Pored toga, ova lokalna zajednica već šestu godinu stipendira i dijete policajca Muhidina Pivodića, koji je ubijen 31. decembra 2012. godine na službenoj dužnosti dok je osiguravao pravoslavnu crkvu Hram svetog Nikolaja u naselju Reljevo.

Pivodića je ubio tada 25-godišnji Anel Ćemo, za što je osuđen na 34 godine zatvora, dok se istraga o počiniteljima ubistva Adisa Šehovića i Davora Vujinovića još uvijek vodi.

22. SJEDNICA OPĆINSKOG VIJEĆA

Od MUP-a KS zatraženo hitno zapošljavanje novih policijskih službenika u Četvrtoj PU Novi Grad

Općinsko vijeće Novi Grad Sarajevo, 21. februara, održalo je 22. sjednicu na kojoj je, između ostalog, razmatralo informaciju o stanju sigurnosti i aktivnostima Četvrte policijske uprave Novi Grad.

Vijećnici su imali različite primjedbe vezane za rad policijskih struktura na određenim mikrolokalitetima, počev od saobraćaja u mirovanju, do provalnih krađa i prisustva policijskih službenika u blizini škola i na drugim javnim mjestima, a jedna od tema bila je i mogućnost dolaska velikog broja migranata na prostor Kantona Sarajevo.

Prema ocjeni pojedinih vijećnika sigurnosna situacija nije zadovoljavajuća, dok su drugi istakli da je policija bolji dio sigurnosnog sistema, te da joj treba pomoći boljim zakonodavstvom, efikasnijim radom pravosuđa, ali i materijalnom i tehničkom podrškom. Na kraju je informacija primljena k znanju, uz jedan zaključak koji se tiče zahtjeva za popunjavanjem jedne trećine nedostajućih službenika u Četvrtoj PU.

Nedostaje trećina policajaca

Načelnik Četvrte PU Nusret Selimović prezentirao je prisutnim vijećnicima aktivnosti koje su u protekloj godini provedene u cilju sprečavanja činjenja krivičnih djela i njihovog rasvjetljavanja, istakavši da je prošlu godinu obilježilo i građane uznemirilo nekoliko tragičnih događaja u kojima su živote izgubila dva policijska službenika, kao i smrt triju djevojaka stradali u teškoj saobraćajnoj nesreći.

Također je kazao da je izvršenje krivičnih djela povećano za 7,8% u odnosu na 2017. godinu, kao i broj saobraćajnih nesreća, te je istakao da Policijskoj upravi na čijem je čelu, nedostaje jedna trećina policajaca, kao i oprema, što svakako otežava njihov rad i prisustvo na terenu.

U tom smislu Vijeće je donijelo zaključak kojim se od MUP-a KS traži hitno zapošljavanje novih policijskih službenika u Četvrtoj PU, te da se novčana sredstva planirana u budžetu Kantona Sarajevo usmjere za kupovinu nadzornih kamera i druge opreme potrebne PU Novi Grad Sarajevo. Vijeće je također donijelo zaključak kojim se traži hitno

usklađivanje svih pravilnika i drugih akata koje je neophodno izmijeniti kako bi se omogućila upotreba kamera, tableta i svih drugih tehničkih pomagala.

Uspostava operativno komunikacijskog centra

Na sjednici je također rečeno i da je Općina Novi Grad u ovoj godini iz budžeta izdvojila 300.000 KM za podršku u radu Četvrte PU, te da se očekuje da će i Kanton Sarajevo riješiti pitanje operativno - komunikacijskog centra MUP-a KS kako bi, prije svega, video - nadzor koje su lokalne zajednice donirale policijskim upravama bio uvezan u jedinstven sistem i bio efikasan kao u drugim velikim gradovima Evrope.

Vijeće nije podržalo prijedlog odluke o pristupanju izradi Urbanističkog projekta „Rezidencijalno naselje Bojnik“, čijim se neusvajanjem stranom investitoru onemogućava gradnja rezidencijalnih objekata na zemljištu u gornjem dijelu Bojnika, koje je trenutno zapušteno i nije u upotrebi, ali je značajno jer se rezidencijalno stanovanje posmatra kao i prva zona kada je u pitanju prihod koji Općina ima od rente, ali i zbog razvoja turizma.

Nije prihvaćen ni izvještaj Službe za boračka pitanja, rad, socijalna pitanja i zdravstvo o dodjeli jednokratne novčane pomoći za pripadnike boračkih populacija za prošlu godinu, jer nije sadržavao imena korisnika ove vrste pomoći. Pomoćnik Općinskog načelnika Tajib Delalić obrazložio je da se radi o sitnim novčanim iznosima, i da Služba nastoji sačuvati dignitet svih korisnika. Napomenuo je da vijećnici mogu izvršiti uvid u spiskove korisnika u prostorijama Službe svaki radni dan.

Na dnevnom redu sjednice bio je i Izvještaj Općinske izborne komisije o provođenju Općih izbora u 2018. godini za osnovnu jedinicu Novi Grad Sarajevo, kojeg vijećnici također nisu prihvatili, uz brojna obrazloženja, kao i da je Izvještaj štur i sa vrlo malo informacija.

Usvojen je prijedlog Odluke za objavljivanje javnog oglasa za imenovanje tri člana



Općinske izborne komisije Novi Grad, kojima za mjesec ističe mandat, kao i izvještaji Općinske službe za obrazovanje, kulturu i sport o stipendiranju učenika i studenata za školsku 2018/19. godinu, zatim izvještaj o realizaciji projekata humanitarnog karaktera za NVO po javnom pozivu u 2018. godini, te izvještaj o realizaciji projekata NVO po javnom pozivu u 2018. godini.

Također su usvojeni i izvještaji o dodjeli pomoći u liječenju teško oboljelih građana i sufinansiranju troškova vantjelesne oplodnje, kao i izvještaj o dodjeli jednokratne pomoći porodicama koje dobiju blizance, treće i svako naredno dijete.

Kružni tok na spoju ulice Safeta Zajke i 12. transverzale

Usvojena je Odluka o izmjenama Regulacionog plana "Briješće" koji se odnosi na rješavanje problema uključivanja saobraćaja iz ulice Safeta Zajke na 12. transverzalu, gdje trenutno uključivanje saobraćaja na 12. transverzalu nije riješeno ni semaforom, niti na drugi propisan način, što prouzrokuje određene probleme u saobraćaju. Izradom ovog plana stvara se mogućnost da JP Ceste FBiH koje su upravitelj magistralnim cestama, izvrše rekonstrukciju te raskrsnice izgradnjom kružnog toka, što će u velikoj mjeri poboljšati kvalitet saobraćaja u tom dijelu općine Novi Grad.

23. SJEDICA OPĆINSKOG VIJEĆA NOVI GRAD SARAJEVO

Usvojen program rekonstrukcije cesta za ovu godinu



Općinsko vijeće Novi Grad Sarajevo usvojilo je na 23. sjednici program rekonstrukcije, održavanja i popravke ulica i lokalnih nekategorisanih cesta za ovu godinu.

Rekonstrukcija 28 ulica

Programom investicionog održavanja i rekonstrukcije cesta planirano je asfaltiranje i sanacija 21 ulice disperziranih po svim mjesnim zajednicama na području Novog Grada. Radovi će se izvoditi u ulicama Cazinska od broja 30 do 60, zatim u Cazinskoj broj 15, gdje će se vršiti izgradnja nosivog potpornog zida, te ulici Harisa Kurtovića od broja 1 do 32, Kenana Demirovića od broja 68 do 54, Avde Hodžića od broja 76 do 60, dijela Kodžine ulice do spoja sa Novopazarskom ulicom, zatim ulice Vejsila Čurčića od broja 51 do 92, Derviša Sude Vražalice od broja 51 do 19, Adema Hubijara od broja 22 do broja 32, Safeta Isovića od broja 36 do broja 44, Smaila Šikala od broja 177 do 181, zatim u ulici Mahmuta Bušatlije čikma, te Safeta Ahmetspahića od spoja sa ulicom Brezanska. U ulici Izeta Karšića čikma radit će se izgradnja nosivog potpornog zida, dok će se u ulici Ramiza Salčina vršiti sanacija dijela ceste od spoja sa ulicom Aleja Bosne srebrene. Radit će se i sanacija dijela ulice Numan paše Čuprilića od broja 200 do broja 208, Braće Bešo od broja 70, Braće Fazlić od broja 30 do broja 28, kao i dva kraka Paljevske ulice, te sanacija dijela ulice Ranovačka od broja 129 do 133, kao i dijela Bjelugovičke ulice.

Planirana je i rezervna lista za sanaciju još sedam ulica kojom je obuhvaćena sanacija dijela ceste od spoja ulice Safeta Hadžića do raskrsnice sa ulicom Bosanskih kraljeva i Kodžina, zatim dijela ulice Adnana Žunića, Enesa Bičića, kao i dijela ulica Paljevska, Dobroševića, Muzafera Mešića, te ulice Adija Mulabegovića.

Radovi će biti usklađeni sa ostalim komunalnim projektima kao što su izgradnja separate kanalizacione mreže, gasne i vodovodne mreže, tako da će se asfaltiranje cesta vršiti nakon radova na instalacijama. Na taj način postići će se veća dugotrajnost saobraćajnica, jer će se time izbjeći prokopavanje ceste što će doprinjeti tome da saobraćajnice duže služe bez intervencija.

JP „Lokom“ će vršiti sanaciju udarnih rupa

Kako je u ranijim godinama bilo problema sa izvođačima radova kod sanacije udarnih rupa koji nisu adekvatno odgovorili zahtjevima Općine, odlučeno je da od ove godine JP „Lokom“ zbog efikasnijeg i bržeg rada preuzme dio ljetnog održavanja koji se odnosi na sanaciju udarnih rupa na lokalnim cestama. „Lokom“ je spreman, radna snaga je spremna i u dijelu koji se tiče redovnog održavanja izdvojeno je 100.000 KM za nabavku tampona, asfaltne mase i emulzije koji će biti dovoljni za saniranje oko 7.000 kvadrata, tačnije većinu udarnih rupa na lokalnim saobraćajnicama.

Na sjednici je usvojen izvještaj o radu Jedinственог općinskog organa i svih općinskih službi u prošloj godini i izvještaj o izvršenju budžeta i godišnji obračun Općine Novi Grad Sarajevo za 2018. godinu, kojim je budžet Općine izvršen u iznosu od 47.487.944 KM.

Istaknuto je dobro planiranje budžeta što je rezultiralo time da su prihodi i rashodi izvršeni sa preko 90 posto.

Izmjene RP „Buća Potok 1“ i „Buća Potok 2“

Usvojena su i dva nacrtu Odluke o izmjenama Odluke o provođenju regulacionih planova „Buća Potok 1“ i „Buća Potok 2“, koji su upućeni u javnu raspravu u trajanju od 20 dana. Nakon toga će prijedlozi RP biti dostavljeni Vijeću na razmatranje i usvajanje. Usvajanjem tih odluka steći će se preduslovi za legalizaciju oko 250 kuća u Buća Potoku koje su izgrađene bez odobrenja za građenje. Vijećnici su usvojili i izvještaj o utrošku sredstava boračkih udruženja za odobrene projekte u prošloj godini sa mišljenjem Službe za boračka pitanja, rad, socijalna pitanja i zdravlje Općine Novi Grad, kao i izvještaj o realizaciji programa prehrane raseljenih lica, povratnika i socijalno ugroženih građana u 2018. godini, te Nacrt Programa 23. Tradicionalne manifestacije „Novogradski dani 2019“.

35. zasjedanje Kongresa lokalnih i regionalnih vlasti Vijeća Evrope u Strazburu



Trideset peto zasjedanje Kongresa lokalnih i regionalnih vlasti Vijeća Evrope održao je sredinom novembra 2018. godine u Strazburu. Kongresu je prisustvovao i načelnik Općine Novi Grad Sarajevo Semir Efendić, kao dio delegacije imenovane od strane Saveza općina i gradova Federacije Bosne i Hercegovine.

Tema trodnevnog zasjedanja bila je 'Integritet i etičko ponašanje lokalnih i regionalnih izabranih predstavnika', a ujedno je obilježeno i 30 godina evropskog poglavlja lokalne samouprave. Govorilo se i o aktivnostima Kongresa u razdoblju od 2016. do 2018. godine, glasačkom pravu na lokalnom nivou itd.

Obzirom da je na ovom zasjedanju izabran novi predsjednik Kongresa, svoje posljednje obraćanje kao predsjednica Kongresa održala je Gudrun Mosler-Tornstorm. Većinom glasova na dvogodišnji mandat predsjednika Kongresa izabran je Anders Knape, predsjednik švedske udruge lokalnih i regionalnih jedinica. Delegaciju Bosne i Hercegovine činili su još predsjednik Federacije Bosne i Hercegovine Marinko Čavara, potpredsjednica Federacije Bosne i Hercegovine Melika Mahmutbegović, ministrica uprave i lokalne samouprave Republike Srpske Rešić Lejla, te načelnik Tomislavgrada Ivan Vukadin. Ovom prilikom oni su se sastali sa ambasadorom BiH, te šefom Stalne misije BiH pri Vijeću Evrope Predragom Grgićem.

Načelnik Općine Novi Grad Sarajevo Semir Efendić sastao se i sa prvom potpredsjednicom Kongresa lokalnih i regionalnih vlasti Barbarom Toce koja je najavila svoju posjetu našoj državi.





Načelnik Semir Efendić ponovo u rukovodstvu Unije općina i gradova turskog svijeta

Na 5. redovnoj Generalnoj skupštini Unije općina i gradova turskog svijeta (TDBB) održanoj u maju ove godine u Istanbulu, načelnik Općine Novi Grad Sarajevo Semir Efendić ponovo je izabran za člana Upravnog odbora Unije. Za predsjednika TDBB-a izabran je gradonačelnik Konye Ugur Ibrahim Altay.

“Drago mi je biti ovdje i čestitam vam na organizaciji Generalne skupštine kao i novoizabranom rukovodstvu koje će biti na čelu TDBB-a naredne tri godine. Ponosan sam što sa ovog mjesta predstavljam Bosnu i Hercegovinu u kojoj je TDBB u proteklom periodu realizovao ili radi na realizaciji brojnih projekata, a nastojat ćemo tu praksu nastaviti i u godinama koje dolaze”, kazao je načelnik Efendić u obraćanju prisutnima.

Podsjećamo, Općina Novi Grad Sarajevo zajedno sa još 21 općinom/gradom iz Bosne i Hercegovine, članica je Unije općina turskog svijeta (TDBB), koja predstavlja most između općina u Republici Turskoj i drugih prijateljskih općina širom Evrope i Azije te u svom radu podržava internacionalne projekte i događaje, a sve sa ciljem uspostavljanja i jačanja prijateljskih odnosa između zemalja članica Unije.

Sastanku su pored predstavnika Republike Turske, prisustvovali načelnici, članovi skupštine TDBB-a i gosti iz 20 zemalja svijeta, uključujući i predstavnike Bosne i Hercegovine. Radi se o veoma moćnoj organizaciji koja broji 1.200 općina i koja učestvuje u realiziranju projekata značajnih za razvoj lokalnih zajednica.

U proteklom periodu TDBB, u saradnji sa svojim članicama u Bosni i Hercegovini godinama učestvuje u realizaciji brojnih projekata. Od većih infrastrukturnih projekata trenutno su u toku izgradnja kulturnog centra u Glamoču, dječijeg parka u Donjem Vakufu, gdje je već završena izgradnja sportske dvorane. U toku je izgradnja zgrade medrese i kuće znanja u Mostaru, ali i rekonstrukcija

osnovne škole u Srebreniku. Unija općina turskog svijeta zajedno sa bratskim općinama Općinom Srebrenica – Općinom Kocaeli, Kecioren i Beykoz iz Turske podržala je i projekat rekonstrukcije Memorijalnog centra u Srebrenici, kao i projekat nabavke minibusa za novootvoreni studentski dom Fakulteta islamskih nauka u Sarajevu. Također brojni su projekti koji se realizuju godinama iz oblasti edukacije, kulture i sporta.





Delegacija Međunarodnog privrednog foruma (IBF) u Općini Novi Grad Sarajevo

Delegacija Međunarodnog privrednog foruma (IBF) koja je boravila u posjeti BiH, 12 januara, posjetila je Općinu Novi Grad Sarajevo. Posjeta je organizovana zbog Međunarodnog privrednog foruma kojem će ove godine u mjesecu oktobru Sarajevo biti domaćin, a koji će okupiti između 600 i 700 značajnih privrednika iz Turske. Delegaciju je predvodio predsjednik IBF-a i osnivač asocijacije privrednika MUSIAD Erol Yarar, te predsjednik Trgovinske komore Istanbula Šekib Avdagić sa saradnicima. Na sastanku je prezentovan rad i djelovanje asocijacije, koja broji blizu 10.000 članica, te planovi

za organizovanje konferencije u drugoj polovini 2019. godine, ali i neki od projekata koje će Općina Novi Grad Sarajevo ponuditi investitorima.

„Riječ je o ozbiljnoj asocijaciji. Konferencija i Općina Novi Grad Sarajevo dat će svoj doprinos njenoj uspješnoj realizaciji. Koordinirat ćemo i sa drugim općinama pri kandidiranju projekata za konferenciju obzirom da smo sa većinom njih u stalnom kontaktu, te se nadamo da će neki od ponuđenih projekata naći svoje partnere među privrednicima koji budu dolazili“, kazao je načelnik Semir Efendić.

Gradonačelnik Tuzle Jasmin Imamović posjetio našu Općinu

Gradonačelnik Tuzle Jasmin Imamović posjetio je 19. februara Općinu Novi Grad Sarajevo. Sa načelnikom Semirom Efendićem azgovarao je o iskustvima u realizaciji projekata u lokalnim zajednicama koje spadaju među najveće u Bosni i Hercegovini kojima su realizirani brojni kapitalni projekti u proteklim godinama. Razgovarali su i o položaju lokalne samouprave u BiH u okviru našeg zakonodavstva i političkog sistema, u kojem je općina najniži nivo vlasti, ali i nivo koji ima najviše dodira sa građanima i najviše problema.

Posebno se ističu problemi u oblasti finansiranja lokalnih zajednica, gdje općinama pripada svega oko 8,5 posto prihoda od indirektnih poreza, dok veliki dio sredstava odlazi na kantone i Federaciju BiH, te da se i pored toga svi ostali nivoi dodatno zadužuju kako bi realizirali svoje budžete.

U tom smislu Općina Novi Grad Sarajevo i Grad Tuzla dijele zajednički stav da je potrebno stvari reformisati i mijenjati kako bi se ojačala uloga lokalne samouprave.



Posao za 41 osobu kroz projekat „Nove strategije zapošljavanja na lokalnom nivou“



Povodom realizacije Projekta „Nove strategije zapošljavanja na lokalnom nivou“, 26. decembra 2018. godine u hotelu Ibis Styles održana je završna konferencija na kojoj su prezentirani rezultati ovog projekta postignuti u privredi i programu zapošljavanja na području općine Novi Grad Sarajevo. Projekat se realizira uz finansijsku podršku Evropske komisije u BiH i Međunarodne organizacije rada (ILO) u BiH, od kojih je Općina dobila podršku za realizaciju projekta obuke i prekvalifikacije radnika za deficitarna zanimanja.

„Radi se projekat o kojim je Općina ranije počela. Bilo je planirano da 55 ljudi prođe obuku i nastavi raditi u određenim firmama. Rezultati su zadovoljavajuć, 41 osoba je počela raditi u partnerskim kompanijama i dobila zaposlenje kroz ovaj projekat. Općina Novi Grad, kao jedina u KS-u koja je ovaj projekat realizirala, prezentirala je

rezultate i drugim općinama, kako bi se taj princip partnerstva lokalne zajednice sa privatnim firmama i drugim javnim ustanovama poput Zavoda za zapošljavanje itd. po istom partnerstvu počeo realizirati i u drugim općinama. Kroz ovaj projekat na neki način se spajaju oni koji traže posao i oni koji posao nude, uz mogućnost da budu finansirani od strane lokalne zajednice i drugih partnera.

Činjenica je da postoji potreba za određenom radnom snagom koje nema na tržištu rada, dok je s druge strane veliki broj nezaposlenih osoba na evidenciji Biroa za zapošljavanje, jer njihova kvalifikacija tržištu ne odgovara.

Projekat „Nove strategije zapošljavanja na lokalnom nivou“, u kojem je Općina Novi Grad Sarajevo vodeći aplikant, finansira se uz podršku EU sredstava kroz Program podrške lokalnim partnerstvima za zapošljavanje u

BiH po programu Međunarodne organizacije rada (ILO) u BiH.

Novi Grad Sarajevo je nosilac projekta sa 7 partnera i to: JU Služba za zapošljavanje Kantona Sarajevo, JU Srednja elektrotehnička škola Sarajevo, Centrotans Eurolines, Mistral Tehnnologies, Cebos, Herbal spa i Centar za razvoj socijalnog poduzetništva. Ukupna vrijednost projekta je 186.000 eura. U sklopu projekta provedena su četiri sofisticirana programa obuke za 60 nezaposlenih osoba, uključujući žene, mlade, osobe sa invaliditetom i osobe koje su nezaposlene duže od dvije godine. Uspostavljen je Centar za inovacije i poduzetništvo u oblasti IT-a pri Srednjoj elektrotehničkoj školi, gdje je do sada obučeno 30 učenika i 45 nezaposlenih osoba, te je uspostavljeno institucionalizovano Lokalno partnerstvo za zapošljavanje i urađen Akcioni plan zapošljavanja.



Uspješan primjer zapošljavanja slijepih i slabovidnih osoba i drugih vrsta invaliditeta

U naselju Nedžarići, u ulici Ramiza Salčina broj 2, nalazi se firma TMP d.o.o koja zapošljava slijepce i slabovidne osobe i osobe sa drugim vrstama invaliditeta.

Podatak da u ovoj firmi radi 39 osoba sa invaliditetom, najviše slijepih i slabovidnih, ovu firmu čini itekako posebnom, jer predstavlja uspješan primjer zapošljavanja ove populacije u državi u kojoj je nezaposlenost jedan od glavnih problema. Osim slijepih i slabovidnih osoba ova firma zapošljava i civilne žrtve rata, ratne vojne invalide, osobe sa cerebralnom paralizom, a šesnaest osoba je sa 100 postotnim invaliditetom.

Firmu TMP osnovao je Savez slijepih Bosne i Hercegovine davne 1968. godine s ciljem da razvija programe i provodi djelatnosti u okviru kojih će se profesionalno rehabilitirati i zapošljavati slijepce i slabovidne osobe i druge osobe sa invaliditetom, što je i danas njihova misija. Prije agresije na BiH TMP je zapošljavao 123 radnika, od kojih 75 osoba sa invaliditetom, a među njima su bile 54 slijepce i slabovidne osobe. Djelatnost im je bila bazirana na izradi predmeta od trikotaže, metala i plastike, po čemu i danas nosi naziv TMP. Za vrijeme rata njihovi objekti su bili devastirani i uništeni,

a kompletna oprema i mašine opljačkani. Na čelu firme je Veselin Rebić, sto posto slijepa osoba, koji se 2003. godine vratio iz Njemačke u BiH i svojim iskustvom doprinio da firma ponovo počne poslovati. Najprije su pokrenuli pržionicu i pakirnicu kafe, te prodavnicu mješovite robe, a već 2004. godine otvorili su ugostiteljstvo odnosno svoj restoran, zatim salon fizioterapeutskih usluga, a onda i štampariju, te proizvodnju salveta od krep papira, izradu rukotvorina od prirodne kože i nakita od srebra i elemenata Swarovskog kristala. Bave se i uzgojem hrane u plasteniku, koju koriste u vlastitom restoranu otvorenog tipa, u kojem se može pojesti domaća i ukusna hrana. Također, prže i pakuju kafu „Dar“, koja se može kupiti u njihovoj prodavnici. Nedavno je kolektiv TMP d.o.o. obilježio 50. jubilej, a uz pedesetu godišnjicu postojanja dodijeljena mu je kolektivna Srebrna plaketa „Safet Hadžić“, Općinsko priznanje koje se dodjeljuje uspješnim pojedincima i kolektivima u povodu Dana Općine Novi Grad Sarajevo - 16. decembra.

„Mi u TMP-u smo ponosni da nakon 50 godina koje su obilježene usponom, padom, pa opet usponom možemo kazati da smo najstarija i najveća zaštitna radionica koja

primarno brine o zapošljavanju slijepih i slabovidnih osoba, ali i o osobama svih drugih vrsta invaliditeta. Uvjereni smo da ćemo dugoročno i u narednom periodu kontinuirano ostvarivati održiv razvoj TMP-a i omogućiti da se OSI u većem broju zapošljavaju i žive od svoga rada“, ističe direktor Ribić.

Nakon što su uočili da čuvarska služba i služba održavanja predstavljaju velika finansijska opterećenja za firmu, na portirnici su uspostavili elektronsku dopunu mobitela, te oformili platenik, tako da momci sa održavanja rade i u plateniku, a proizvedeno provrće koristi se u restoranu, dok preostalo prodaju građanima.

Direktor Ribić naglašava da su sposobnosti osoba koje zapošljava ova firma dosta male, međutim kontinuirano se radi na profesionalnoj rehabilitaciji, edukaciji, na savladavanju vještina, teorijskoj obuci zaposlenih, ali i onih koji nisu zaposleni kako bi ih motivisali da se na tržištu rada pojavljuju i traže zaposlenja. Na taj način vremenom su uspjeli podići nivo radnih sposobnost zaposlenih i povećati učinke, odnosno rezultate njihovog rada.



Salon fizioterapeutskih usluga

Zbog izraženog osjećaja za dodir, slijepe osobe smatraju se najboljim fizioterapeutima u svijetu. U fizioterapeutskom centru, koji je ujedno i najprofitabilnija djelatnost firme TMP, svaki dan od devet ujutro do devet navečer rade školovani i vrijedni fizioterapeuti koji su također slijepe osobe. Oni pružaju potpuni i profesionalni fizioterapeutski tretman, a njihove usluge koristi veliki broj građana sa područja Kantona Sarajevo i šire. To su vrlo stručni fizioterapeuti koji su u redovnom školovanju stekli zvanje fizioterapeuta, a stažirali su u javnim zdravstvenim ustanovama i položili stručne ispite.




Štamparija pruža usluge brojnim institucijama

Štamparija pruža usluge brojnim državnim institucijama, od Ureda za reviziju BiH, Instituta za standardizaciju ombudsmena, Poreske uprave FBIH, fakulteta, raznih preduzeća, do građana pojedinaca.

„U vremenu kada se mnoge štamparije zatvaraju, naša posluje pozitivno, što znači da se ljudi koji su tu zaposleni, a osobe su sa invaliditetom, maksimalno trude u svom poslu. Uspijevamo osigurati sredstva da redovno isplatimo plate, da ne dugujemo dobavljačima i državi.

Naš prvenstveni cilj je da se osobe sa invaliditetom održe na radnom mjestu, da se unapređuju i ostvaruju svoju karijeru, jer važno je imati na umu da osoba sa invaliditetom stekne određeno zvanje i onda čeka dugo na posao, ona izgubi vjeru u sebe, postane teret i sebi i porodici, užoj i široj sredini i poslije je teže ostvariti profesionalnu rehabilitaciju“, naglašava Ribić.



Predavanje iz oblasti uređenja i poboljšanja kvaliteta zemljišta



Edukacija o sigurnosti hrane i njen uticaj na zdravlje održana je u vijećničkoj sali Općine Novi Grad Sarajevo, a predavanje je održala dr. sc. Ramzija Cvrk, vanredni profesor za užu naučnu oblast "Prehrambena tehnologija" na Odsjeku agronomije Tehnološkog fakulteta u Tuzli.

Profesorica Cvrk govorila je o konceptu sigurnosti hrane/ temeljnim načelima sigurnosti hrane, zatim primjeni standarda za sigurnost hrane (GlobalGAP i HACCP), te o zakonodavnom okviru za sigurnost hrane. Također su prisutni imali priliku čuti više informacija o procjeni rizika, predstavljeni su im modeli procjene rizika u sistemu sigurnosti hrane; Lanac sigurne hrane /Proces kontrole kvaliteta hrane; Zdravstvena sigurnost hrane i zdravlje ljudi/Aspekti kvaliteta hrane.

Na praktičnoj nastavi profesorica Cvrk je praktično demonstrirala kontrolu pojedinih parametara kvaliteta hrane (uz pomoć prijenosnih instrumenata i aparata), demonstraciju pravilnog pakovanja prehrambenih proizvoda u odgovarajuću ambalažu i pravilan odabir parametara čuvanja hrane na duži period.

U Općini Novi Grad registrirano 377 novih poduzetnika

U Općini Novi Grad Sarajevo potpisana su još 24 ugovora za sufinansiranje troškova samostalnih poduzetnika/ka – početnika u biznisu, čime ova lokalna zajednica podržava novoregistrirane početnike u biznisu.

Ova mjera je podrška poduzetnicima koji prvi put osnivaju biznise u vidu obrta, trgovinske radnje ili ugostiteljstva, a koji su registrirani na području naše općine.

U nadležnoj Općinskoj službi za privredu i lokalni ekonomski razvoj do sada je registrirano 377 novih biznisa, start up-a, a prošla godina je jedna od najboljih u poslijeratnom periodu kada su u pitanju nove registracije u Općini Novi Grad.

„Već sada možemo reći da imamo u potpunosti realiziran plan u okviru kojeg smo početnike u biznisu podržali sredstvima u iznosu od 220.000 KM. To pokazuje da Općina Novi Grad Sarajevo, osim što je interesantna domaćim i stranim investitorima kao najveće lokalno tržište, gdje je u prethodnom periodu došlo do povećanja broja novozaposlenih i smanjenja nezaposlenih osoba, postaje na neki način i poduzetnička zona, gdje imamo dosta novootvorenih biznisa, onih koji se registriraju kao obrti, trgovina, ugostitelji i zanatlije“, izjavio je Kahrović.

Kahrović je naglasio da će ova mjera zajedno sa ostalim koje Općina provodi putem Službe za privredu i lokalni ekonomski razvoj u smislu podrške privredi značajno doprinijeti parametrima koji će značiti ekonomski razvoj ove lokalne zajednice.



Na Sarajevskom sajmu turizma predstavljani turistički potencijali općine Novi Grad Sarajevo



Općina Novi Grad Sarajevo bila je jedna od učesnica Sarajevskog festivala turizma, koji je održan u Centru Skenderija, s ciljem afirmisanja domaće turističke ponude i razvojnih potencijala.

Ovogodišnji festival okupio je 70 izlagača iz Crne Gore, Hrvatske, Makedonije, Turske, Indije i Bosne i Hercegovine. Općina Novi Grad Sarajevo je zakupom sajamskog prostora omogućila besplatno učešće privrednih subjekata koji djeluju u oblasti turizma na njenoj teritoriji.

Bila je to prilika da se mnogobrojnim posjetiocima predstave djelatnosti kojima se bave privredni subjekti: OD „Domestic“, prvi bh. proizvođač humusa, kikiriki putera, badem putera i tahina, zatim Ibis Styles – hotel Sarajevo, kao i Heljda eko d.o.o.

Sarajevo, certificirani proizvođač žitarica i ljekobilja i proizvodnje zdrave hrane.

Na sajmu su se predstavili i OD „Klementina“, proizvođač sapuna od filcane vune i Herbal Spa d.o.o. Sarajevo, koja se bavi pružanjem specifičnih kozmetičkih i fizioterapeutskih usluga za njegu tijela. Poseban segment za razvojno djelovanje u oblasti turizma predstavljaju turističko - rekreativni kapaciteti na teritoriji općine koji su reprezentativni i u skladu sa važećim međunarodnim standardima za organizaciju sportskih događaja od većeg značaja, a koji su posjetiocima Sajma predstavljeni u saradnji sa Javnim preduzećem „Lokom“.

Jedan od takvih primjera je Centar „Safet Zajko“ kojeg godišnje posjeti oko 300.000

ljudi, a koji građanima i posjetiocima Sarajeva pruža boravak i uživanje u najvećem parku u Sarajevu, zelenoj oazi mira, ali nudi i raznovrsne sportsko - rekreacione sadržaje za djecu, sportiste i rekreativce.

Osim kompleksa Centra „Safet Zajko“ u saradnji sa Javnim preduzećem „Lokom“ promovisani su i drugi turistički potencijali sa područja Novog Grada kao što su Dom oslobođilaca na Žuči, Park šuma Mojnilo sa proizvodno - edukativnim poligonom urbane poljoprivrede, gdje se vrši organska proizvodnja hrane, zatim kino i Galerija Općine Novi Grad, te novi promo i video materijali o turističkim potencijalima i kapacitetima Općine.

Novčane nagrade za najuređenija dvorišta, balkone i ulaze u stambene zgrade



U parku Centra „Safet Zajko“ upriličeno je potpisivanje ugovora za dodjelu novčanih nagrada za hortikulturno najuređenije balkone, dvorišta i ulaze u stambene zgrade na području općine Novi Grad Sarajevo. Ugovore je sa dobitnicima nagrada potpisao Džemaludin Kahrović, pomoćnik načelnika Općine Novi Grad Sarajevo za privredu i lokalni ekonomski razvoj.

Na ovaj način Općina nastoji podstaći stanovnike i privredna društva na hortikulturno uređenje svojih dvorišta, avlija i balkona, što bi trebalo rezultirati ljepšim ambijentom u cijeloj općini, ali i glavnom gradu BiH.

„U Centru „Safet Zajko“ smo upravo iz razloga što smo željeli da povežemo hortikulturno uređenje balkona, dvorišta i ulaza u stambene zgrade i najveći i najljepši park u gradu Sarajevu i BiH. Ova mjera ranije

je planirana i jedna je od 150 projekata planiranih Strategijom razvoja općine Novi Grad Sarajevo za period 2016-2020. godine. Pozivamo i druge stanovnike da svi zajedno izgradimo bolji i ljepši ambijent u Novom Gradu i Sarajevu, jer samo zajedno možemo napraviti napredak u društvu“, izjavio je Kahrović.

Halida Mešanović za uređenje dvorišta porodične kuće u Dobroševićima osvojila je prvu nagradu. Na uspomenu na poginule sinove Nihada i Nedžada Halida je svu ljubav posvetila uređenju bašte. Zamolila je sve ljude da se potrudu da svojim angažmanom uljepšaju životni prostor, kako bi nam grad i domovina bili što ljepši.


Nisveta Jamak, profesorica u penziji, osvojila je treću nagradu za uređenje dvorišta. Ona se hortikulturnim uređenjem bavila i prije rata, a posebno se posvetila

uređenju zelenila oko porodične kuće kada je dobila unuke, jer želi da im bude uzor.

„Jako puno ljubavi i truda uložila sam u to dvorište. Voljela bi da i drugi vide i primijene u svojoj sredini u kojoj žive. Kada sam svoje unuke pitala šta da radim sa nagradom, one su mi rekle da novac damo u humanitarne svrhe, a tako će i biti“, ispričala je gospođa Jamak.

Za najuređeniji ulaz u stambenu zgradu, dvorište i balkon Općina je osigurala novčane nagrade i to u kategoriji najljepšeg ulaza u stambenu zgradu, za prvo mjesto 500 KM, drugo 400 KM i treće 300 KM“. Vlasnici najuređenijeg dvorišta nagrađeni su sa 400 KM, dok druga nagrada iznosi 300 KM, a treća 200 KM. Za najljepši balkon prva nagrada iznosi 300 KM, druga 200 KM, a treća 100 KM.

Otvoren Centar za edukaciju i obuku za rad na CNC i laserskim mašinama



U Centru „Safet Zajko“ počeo je sa radom Centar za edukaciju, dokvalifikaciju i prekvalifikaciju u kojem se vršiti obuka za programiranje i rad na CNC i laserskim mašinama. Obuka radnika za rad na CNC mašinama vrlo je važna, jer na tržištu postoji velika potreba za kvalifikovanim cnc operaterima. To su laserske CNC mašine koje se koriste u različitim proizvodnim djelatnostima od tekstilne industrije, drvne, plastične itd.

Ovaj vid saradnje između javnog i privatnog sektora trebao bi doprinijeti smanjenju nezaposlenosti na način što će spojiti obuku sa potrebama tržišta rada. Obzirom da je na tržištu rada

prisutan problem nedostatka kvalifikovane radne snage i da je veliki broj ljudi prošao kroz formalni sistem obrazovanja jedino što je moguće je da se radi neka vrsta dokvalifikacije i prekvalifikacije. Općina je prije dvije godine krenula u te procese izdvajajući jedan dio sredstava iz budžeta za programe prekvalifikacije i dokvalifikacije. Planirano je da godišnje taj proces prođe oko 40 osoba.

„Ovo je jedan specifičan program, obzirom, da smo u Novom Gradu imali firmu koja se bavi proizvodnjom CNC mašina, a koje su u skoro svim proizvodnim procesima nezaobilazne, odlučili smo se da zajedno sa njima krenemo u proces da se uspostavi

Centar za edukaciju i prekvalifikaciju u kojem bi firma radila obuku nezaposlenih osoba u sklopu svoje proizvodnje“, kazao je načelnik Efendić.

Za tu namjenu Općina je adaptirala devastirani objekat u kompleksu Centra „Safet Zajko“ u koji je uloženo 320.000 KM i pripremila ga kako bi firma Dizart sa svojim mašinama i opremom mogla uspostaviti Centar za obuku.

Prema riječima Jasmina Ahmića, direktora firme Dizart, ova kompanija proizvodi CNC mašine za međunarodno tržište i jedina je u BiH koja to radi. Ove godine imaju više od 80 posto izvoza za Irsku, Englesku i druge zapadno evropske zemlje.

TURIZAM: Dva nova luksuzna hotela u općini Novi Grad

Općina Novi Grad radi na razvoju turizma na svom području koji je u zamahu razvoja u glavnom gradu BiH i Kantonu Sarajevo. Ova lokalna zajednica ima značajne prednosti kada je u pitanju sportski turizam sa velikim brojem sportskih i rekreacionih sadržaja, od sportskih dvorana, stadiona, biciklističkih staza itd. To je praćeno novim brojem smještajnih kapaciteta u našoj općini, gdje su dva svjetska hotelska lanca ušla na tržište općine Novi Grad, čime je obogaćena hotelsko - turistička ponuda u glavnom gradu BiH.

Ibis Styles hotel

Grupacija Ibis Styles kupila je hotel „Sarajevo, udvostručila njegov kapacitet, uložila 30 miliona maraka u njegovu kupovinu i rekonstrukciju, upravo u stilu zimskih sportova po čemu je Sarajevo poznato i u skladu sa našom tendencijom razvijanja sportsko - rekreacionog turizma. Hotel je dio jedne od najvećih svjetskih grupacija AccorHotels, a sredinom novembra otvorio je svoja vrata prvim posjetiocima Sarajeva i domaćim gostima. Radi se o jednom od najvećih i najboljih hotela u Sarajevu kapaciteta od oko 180 soba, spa centrom, restoranom i kafeom, te panoramskim barom smještenim na 15 spratu hotela i kongresnim dvoranama koje mogu primiti oko 800 osoba i drugim sadržajima. To je jedan od najvećih konferencijskih kapaciteta u glavnom gradu BiH.



Bosmal Arjaan by Rotana

Također, veliki svjetski hotelski lanac Rotana group kupio je kulu B Bosmal City centra, gdje će uskoro biti otvoren jedan od najvećih hotela na Balkanu tzv. Arjaan hotel. Tako će jedana od vodećih bliskoistočnih hotelijerskih kompanija prvi put u svom postojanju otvoriti jedan od svojih hotela u Evropi i to upravo u općini Novi Grad Sarajevo. Novi hotel najviši je stambeni objekat na Balkanu i drugi najviši toranj u Sarajevu, a raspolagat će sa 132 apartmana, restoranom, urban kafeom, modernim kafe restoranom. Gostima će biti na raspolaganju 24-satna posluga u sobama, kao i fitness i wellness klub, zatvoreni bazen, sauna, parne sobe uz tursko kupatilo i sobe za masažu i sale za sastanke.


Iz kompanije Rotana ističu zadovoljstvo što što će uskoro imati mogućnost da svojim gostima ponude smještaj u jednoj od najvećih sarajevskih općina, općini Novi Grad. Dolazak ovog brenda u glavni grad BiH iznimno je važan za unapređenje turističkih kapaciteta, povećanja konkurentnosti na tržištu, ali i otvaranja novih radnih mjesta i zapošljavanje domaće radne snage. S obzirom na činjenicu da Sarajevo bilježi godišnji rast broja posjetilaca, važno je da povećanje hotelskih kapaciteta prati povećanje broja turista.



Bosmal
Arjaan
by Rotana
Sarajevo

ibis
STYLES
HOTELS

ibis
STYLES
HOTELS



Počela izgradnja oborinske kanalizacije u industrijskoj zoni Bačići




Radnici konzorcija firmi Manjo i Bosman rade na izgradnji primarnog sistema odvodnje oborinske vode za područje industrijskih zona Bačići i Telalovo polje, te dio naselja Briješće na području općine Novi Grad.

U toku je postavljanje cijevi profila FI 1.400 u dužini od oko 500 metara od Miljacke uz trasu željezničke pruge Sarajevo – Ploče, kao i izgradnja šahtova. Tim radovima prethodili su pripremni radovi, iskopi i uklanjanje šiblja i drugog rastinja. Vrijednost radova je 681.408 KM, a projekat se provodi u saradnji sa Ministarstvom privrede Kantona Sarajevo.

Realizacijom ovog projekta omogućit će se normalno funkcionisanje velikog broja firmi u industrijskim zonama Bačići i Rajlovac, smanjiti oštećenje saobraćajnica i ostale infrastrukture u vrijeme većih padavina. Također, izgradnjom ovog sistema odvodnje velikih količina oborinskih voda koje se slijevaju prirodnim potocima niz naselje Briješće do mjesta recipijenta, odnosno Miljacke, omogućit će se izgradnja separate kanalizacione mreže u ulicama Safeta Ahmetpahića i Brezanska u naselju Briješće.



Potpisan ugovor za izvođenje radova na trajnoj regulaciji korita Dobrinje



Ugovor za izvođenje radova na trajnoj regulaciji korita rijeke Dobrinje u vrijednosti od oko 450.000 KM potpisali su načelnik Općine Novi Grad Sarajevo Semir Efendić i direktorica građevinske firme „Orman“ Bedrija Hodžić.

Radi se o nastavku trajne regulacije rijeke Dobrinje čije je korito većim dijelom ranije regulisano, a ostalo je još da se uradi oko 500 metara do granice sa Općinom Ilidža. Ovim ugovorom radić će se regulacija rijeke u ulici Hajrudina Šabanije od naselja Mahala do mosta u ulici Aleja Bosne srebrene u dužini od oko 200 metara. Na tom dijelu korito i obale rijeke su obrasle šibljem sa djelimično strmim obalama podložnim erodiranju, što utiče na normalan protok vode prilikom obilnih padavina ugrožavajući okolno naselje. Obzirom da prolazi kroz naselje gdje je jedan broj objekata izgrađen u neposrednoj blizini samog korita rijeke,

u jednom dijelu radić će se trapezasto, a u drugom sandučasto korito, čime će se onemogućiti izlivanje rijeke iz korita u vrijeme većih padavina.

Realizacija ovog projekta dio je aktivnosti koje Općina kontinuirano provodi kada je u pitanju regulacija i trajno rješavanje vodotoka na prostoru općine Novi Grad. Vodotoci Dobrinje, Lepenice i drugi manji vodotoci treće kategorije pripadaju nadležnosti Općine, a u saradnji sa Ministarstvom privrede Kantona Sarajevo u prošloj godini se radilo čišćenje i regulacija rijeke Miljacke u zoni Halilovića i izgradnja mosta koji je stavljen u funkciju. U isto vrijeme, u saradnji sa Agencijom za vodno područje rijeke Save provode se aktivnosti regulacije rijeke Bosne koja spada u vodotok prve kategorije. Ulaganja u regulaciju riječnih korita Bosne, Miljacke, Dobrinje i Lepenice, te njihovih pritoka rezultirala su značajnim

smanjenjem rizika od poplava.

„Ostalo je da se reguliše još oko 3,5 kilometara korita Bosne koje radi Agencija za vodno područje rijeke Save, a Općina radi na rješavanju imovinsko - pravnih odnosa. Sa tim projektom došlo se do ušća Miljacke u Bosnu, tako da su nakon regulacije tog dijela Bosne poplave znatno manje izražene. Ostaće još da se uradi 300 metara Dobrinje, manji dio gornjeg toka Lepenice, a cilj je da u narednih nekoliko godina sva korita rijeka na području Novog Grada budu trajno regulisana i da kao takva ne predstavljaju više opasnost kada su u pitanju sezone poplava“, kazao je općinski načelnik Semir Efendić.

Direktorica Hodžić istakla je da je zadovoljstvo raditi na ovom projektu, te da će radovi biti izvedeni kvalitetno i na vrijeme.




Novi sadržaji u Centru „Safet Zajko“, adrenalin park, nova sportska i dječija igrališta

Kompleks Centra „Safet Zajko“ obogaćen je novim sadržajima. Pri kraju su radovi na izgradnji adrenalin parka, u čijim će sadržajima građani uskoro moći uživati.

Uz tornjeve na kojima se nalaze alpinističke stijene, ljubiteljima adrenalin sportova na raspolaganju će biti i devet vazdušnih atrakcija sa različitim preprekama. Prepreke su postavljene tako da postojeća stabla povezuju sa dva tornja, a u narednom periodu bit će izgrađen i zip- line, žica za spuštanje.

Osim toga, iz općinskog budžeta su izdvojena i sredstva za izgradnju sportskog terena sa umjetnom travom i tribinama, koji će biti ograđen i osvijetljen kako bi se mogao koristiti i u večernjim satima, kao i za obnovu objekta u kojem će biti izgrađene svlačionice za korisnike sportskih terena.

Fudbalsko igralište projektovano je u skladu sa kriterijima za dječiji uzrast do 13 godina, a bit će podijeljeno na tri manja terena namijenjena za mali fudbal, te se, po potrebi, može pregraditi zaštitnom zavjesom i koristiti kao više manjih terena za mali fudbal. Centar „Safet Zajko“ smješten je u središtu Novog Grada, udaljen nekoliko stotina metara od tramvajskog i autobusnog saobraćaja. Park sadrži atletsku stazu, fudbalski teren sa vještačkom travom, teren za skok udalj, košarkaški teren, dječija igrališta, teren za odbojku na pijesku, teniska igrališta, šadrwane i klupe za odmor, te druge sadržaje.





Novo igralište u dvorištu vrtića “Dječiji grad” na Mojmilu

Općina Novi Grad Sarajevo u saradnji sa Gradskom upravom Grada Sarajeva izdvojila je finansijska sredstva za rekonstrukciju dječijeg igrališta u sklopu vrtića “Dječiji grad” u naselju Mojnilo.

Urađena je rekonstrukcija starog igrališta u dvorištu vrtića na kojem je bio oštećen i dotrajavao mobilijar, što je predstavljalo problem po sigurnost djece. Njegovom obnovom mališani će imati na raspolaganju novi i ugodniji prostor za igru. Osim rekonstrukcije igrališta u sklopu radova uređeno je i dvorište, a novo dječije igralište osmišljeno je tako da se ambijentalno uklopi u postojeći prostor.

Kroz dječije igralište su izgrađene nove staze, koje dijele prostor za igru djece uzrasta do tri godine i stariju djecu, dok središnjim dijelom dominira hortikulturno uređena površina.

Prostor za dječiju igru opremljen je novim mobilijarom i modernim spravama za igru. Urađeno je tamponiranje terena, postavljeno je rizlo, ivičnjaci i gumena podloga, a izvršena je montaža kule sa toboganima, ljuljački i klackalica, a postavljena je i kućica sa pješčanikom i postavljene preostale rekvizite, kao i klupe za sjedenje i korpe za otpatke.



Potpisan okvirni sporazum za rekonstrukciju blizu 2,5 kilometara vodovodne mreže u naselju Zabrđe



Općina Novi Grad Sarajevo nastavlja sa rekonstrukcijom stare dotrajale vodovodne mreže na svom području kako bi se poboljšao kvalitet vodosnabdijevanja novogradskih naselja i smanjili gubici vode.

Potpisan je okvirni sporazum sa izvođačem radova na rekonstrukciji 2.300 metara postojećeg azbestno - cementnog cjevovoda u naselju Zabrđe, gdje je zbog velikih gubitaka vode smanjen kapacitet isporuke. Vrijednost radova je 542.178 KM, a rekonstrukcija cjevovoda radit će se u dijelu ulica Safeta Zajke i Avde Palića, od Rajlovca do spoja ulica Avde Palića i Zaima Imamovića u Zabrđu.

Predviđena je rekonstrukcija dotrajale distributivne vodovodne mreže DN 200 milimetara, 150 milimetara i 100 milimetara u dijelu ulice Safeta Zajke neposredno prije raskrsnice za put Reljevo – Rajlovac, zatim ulicama Avde Palića, Porodice Bećirbašić i Porodice Šehić te dijelu ulice Zaima Imamovića.

Neadekvatna azbestno - cementna vodovodna mreža bit će zamijenjena kvalitetnijim daktil cjevovima i na taj način će se poboljšati funkcionalnost vodovodnog sistema i samanjiti gubitak vode u ovom dijelu općine Novi Grad Sarajevo.

Preuslovi za realizaciju ovog projekta stekli su se rekonstrukcijom glavnog distributivnog cjevovoda kroz Rajlovac, koja je završena u prošloj godini, gdje je povećan profil cjevovoda sa DN 200 na DN 300, a koji je do tada imao najveće gubitke na mreži na prostoru općine Novi Grad.

Rekonstrukcija starog distributivnog cjevovoda u Rajlovcu

Završeni su radovi na rekonstrukciji dijela starog distributivnog cjevovoda na dionici ulicom Rajlovačka cesta i u Rajlovačkom polju koji će vodom snabdijevati pumpnu stanicu u Briješću, a odakle će se putem potisnog cjevovoda voda distribuirati prema rezervoaru u Naselju heroja Sokolje.

Vrijednost radova na izgradnji 3,5 kilometra potpuno nove mreže u zoni u kojoj je prema mjerenjima KJKP Vodovod i kanalizacija dolazilo i do 90 posto gubitaka vode iznosi oko 960.000 KM.

Kako je pojasnila Azra Goralija, šefica gradilišta rekonstruisana je stara cijev i položena daktilna cijev profila FI 300. Shodno vremenskim uslovima radit će se i preostali dio trase ulicom Safeta Zajke do pumpne stanice u ulici Franje Kluza.

Završetkom preostalog dijela ovog vodovodnog sistema kompletiraće se oko 5,5 kilometara potpuno nove vodovodne mreže, zajedno sa potisnim i distributivnim cjevovodom koji je već izgrađen od pumpne stanice u Briješću do rezervoara na Sokolju. Time ćemo od iduće godine imati vodu i u novoizgrađenom rezervoaru Sokolje, nakon čega preostaje izgradnja distributivne mreže kojom će se vodom snabdijevati skoro cijelo naselje Zabrđe, dijelovi Naselja heroja Sokolje, a čime će biti u potpunosti zaokružena izgradnja i obnova vodovodne mreže kada su u pitanju velika naselja na prostoru općine Novi Grad.

Vrijednost tih radova je oko 2 miliona konvertibilnih maraka i u potpunosti ih je realizirala Općina Novi Grad, kroz sredstva iz vodnih naknada koja pripadaju općinama i vlastitim sredstvima.

Završetkom ovog velikog i skupog sistema u potpunosti će se promijeniti stanje vodosnabdijevanja u ovom dijelu općine Novi Grad



Izgrađen potisni cjevovod za rezervoar u Naselju heroja Sokolje

U Mjesnoj zajednici „Naselje heroja Sokolje“ završeni su radovi na izgradnji potisnog cjevovoda dužine kilometar i po, od pumpne stanice Briješće do rezervoara za vodu na Sokolju. Vrijednost radova je 330.000 KM.

Paralelno sa izgradnjom potisnog cjevovoda između pumpne stanice i rezervoara, urađena je i rekonstrukcija 1.400 metara distributivno - dovodnog cjevovoda DN 300 na potezu Butile - Rajlovac, gdje su gubici vode bili i do 90 posto zbog dotrajalosti mreže. Preostalo je da se uradi rekonstrukcija još blizu dva kilometra distributivno - dovodnog cjevovoda, od Rajlovca ulicom Safeta Zajke do ulice Franje Kluzja, prema pumpnoj stanici u Briješću, čime će biti upotpunjen sistem vodosnabdijevanja za rezervoar Sokolje.

Izgradnja ovog sistema dugogodišnji je proces ulaganja u vodosnabdijevanje ovog dijela općine. Radi se o sistemu vodosnabdijevanja u zoni rezervoara Sokolje, koji je ranije izgrađen, kao i pumpna stanica u ulici Franje Kluzja koja će taj rezervoar snabdijevati vodom. Puštanjem u funkciju rezervoara kapaciteta 1.000 kubika vode poboljšat će se vodosnabdijevanje naselja Zabrđe i dijelova Sokolja, gdje se ljeti stanovništvo vodom snabdijeva pomoću cisterni. Izgradnja pumpne stanice u Briješću koštala je oko 300.000 KM, dok je za izgradnju rezervoara u Naselju heroja Sokolje iz budžeta izdvojeno oko 450.000 KM.



Nakon rekonstrukcije vodovodne mreže u ulici Numan-paše Ćuprilića i novi asfalt

U ulici Numan-paše Ćuprilića završena je rekonstrukcija postojećeg dotrajalog cjevovoda i kućnih priključaka, od spoja sa ulicom Ibre Česke do rezervoara za vodu na Sokolju, a pri kraju su radovi na rješavanju odvodnje površinskih voda koje nisu bile riješene. Ugrađene su cijevi i slivnici, postavljen je i tamponski sloj nakon čega je saobraćajnica asfaltirana. Za radove na distributivnom cjevovodu iz budžeta Općine izdvojeno je 130.000 KM.

U MZ „Dobroševići“ otvoreno prvo sportsko igralište

Na radost mnogobrojnih stanovnika naselja Bojnik otvoreno je prvo sportsko igralište u ovom dijelu Novog Grada. Sportski teren je ograđen i mjesto je na kojem će djeca i omladina moći provoditi slobodno vrijeme.

Stavljanje u funkciju ozvaničeno je uz prisustvo predstavnika Općine Novi Grad Sarajevo, učenika OŠ „Mustafa Busuladžić“, predstavnika Savjeta mjesne zajednice, vijećnika Općinskog vijeća i građana.

„Zadovoljan sam da smo uspjeli izgraditi sportsko igralište za djecu ovog mjesnog područja koje se intenzivno razvija i naseljava, a u kojem do sada nije bilo niti jednog igrališta. Vjerujem da će ovaj sadržaj uljepšati njihov svakodnevni život, i život njihovih porodica i da će njihovi roditelji manje brinuti kada su njihova djeca na igralištu, jer je to najbolje mjesto za njihovu igru“, kazao je načelnik Općine Novi Grad Sarajevo Semir Efendić.

Dodao je da će se pored ovog igrališta u narednom periodu graditi i dječije igralište za djecu manjeg uzrasta.

Ismet Žiga, predsjednik Savjeta MZ „Dobroševići“ izrazio je zadovoljstvo realizacijom još jednog projekta na ovom mjesnom području. „Ovo je prvo igralište u najvećoj mjesnoj zajednici na čijem području živi oko 15.000 stanovnika. Do sada su djeca bila ograničena da se igraju u školskom dvorištu i sportskoj sali koja je nedavno izgrađena. Sada imaju još jedan prostor za igru i sportske aktivnosti“, kazao je Žiga.

U proteklom periodu Općina je otkupila zemljište za potrebe izgradnje sportskog i dječijeg igrališta, koje je koštalo 137.000 KM. Pored sportskog igrališta izgrađen je i pristupni put, te ucijevljen potok koji protiče u blizini igrališta. Radovi su koštali oko 98.000 KM.

Na području ove mjesne zajednice u proteklim godinama izgrađena je ambulanta porodične medicine, završen je i novi dio škole „Mustafa Busuladžić“ i sportska sala, kao i drugi infrastrukturni projekti.





Gradi se konstrukcija sportske dvorane u Boljakovom Potoku



Nakon izgradnje temeljne ploče sportske dvorane i dijela Osnovne škole „Umihana Čuvidina“ radnici građevinske firme Eko - Teh rade konstrukciju objekta, a već su završeni AB zidovi suterenskog dijela u kojem će se nalaziti garaže, potvrdio nam je tehnički direktor Eko - Teh firme Mile Đurović.

„Završena je i hidroizolacija zidova, a trenutno se rade oplata, horizontalna konstrukcija greda i armiranje ploče iznad garaže, kao i hidro i termo izolacija spoljnih zidova, kazao je direktor Đurović.

Početak izgradnje objekta prethodili su radovi na rušenju i uklanjanju montažnog dijela škole, zatim zemljani radovi u sklopu kojih je urađena stabilizacija padine sa šipovima i sidrima, nakon čega je betonirana temeljna ploča sportske dvorane veličine oko 2.000 kvadrata, u koju je ugrađeno 1.300 kubika betona, a za pripremu ploče ugrađeno je 1.140 tona armature.

Osim sportske dvorane u sklopu ovog impozantnog objekta, čija je vrijednost oko 5,1 milion konvertibilnih maraka, bit će izgrađene podzemne garaže, obdanište, fitness centar i ambulanta, te 11 učionica.

Riječ je o jednom od najznačajnijih kapitalnih projekata Općine Novi Grad, čijom realizacijom će učenici jedne od najvećih škola u Kantonu Sarajevo dobiti bolje uslove za odvijanje nastavnog procesa, a stanovnici naselja bolje uslove za življenje.

Škola je izgrađena 1970. godine, a dograđena 1980. godine, imala je fiskulturnu salu veličine dvije manje učionice što je bilo nedovoljno za odvijanje nastave za 940 učenika koji školu pohađaju. Proširenjem kapaciteta škole i izgradnjom sportske dvorane steći će se uslovi da se nastavni proces odvija u dvije, umjesto u tri smjene kako je to do sada bilo. Osim toga prvi put će ovo naselje dobiti i obdanište.



Obnovljena fasada najoštećenijih zgrada u Saraj Polju



Obnovljena je fasada najoštećenijih stambenih zgrada u ulici Senada Mandića Dende broj 2, 3 i 4, u naselju Saraj Polje. Zgrade su tokom ratnih djestava bile na prvoj borbenoj liniji i pretrpjele su velika oštećenja tako da nije bilo moguće da stanari putem upravitelja obezbijede dovoljno sredstava da bi se sanacija uradila na adekvatan način.

Iako je Ministarstvo za stambene poslove KS-a ranije saniralo većinu takvih objekata u Sarajevu, ove zgrade ipak nisu ušle u njihov program, te su u prošloj godini u budžetu planirana sredstva za njihovu sanaciju u okviru hitnih intervencija.

Zgrade u naselju Saraj Polje izgrađene su neposredno prije agresije na našu zemlju, rađene su po standardima energetske efikasnosti, tako da je u sastavu fasade



i termoizolacija, koja je tokom ratnih dejstava bila oštećena. Sanacijom fasada završen je i taj dio termoizolacije koji je bio oštećen, tako da će stanarima od iduće zime biti mnogo lakše.

Nermin Balić, član Savjeta MZ Saraj Polje istakao je zadovoljstvo što će 23 godine nakon rata ova zgrada biti obnovljena. „Doselio sam se u ovo naselje odmah nakon njegove izgradnje, bilo je to prelijepo naselje koje je devastirano u toku rata, a ovo je najoštećeniji dio naselja, jer su iz pravca Nedžarića tokom rata pamovi, patovi, tzv. „sijači smrti“ dejstvovali po ovom dijelu naselja. Hvala Općini koja je imala razumijevanja i pristupila sanaciji oštećenja, jer mi ovo ne bi mogli isfinansirati. Nakon ovih radova naselje će biti još ljepše nego što je bilo prije rata“,



kazao je Balić.

Radovi u ulici Senada Mandića Dende koštati će oko 200.000 KM. U programu za ovu godinu planirana je i sanacija velikog oštećenja u stambenoj zgradi u C fazi Alipašino Polja, u Geteovoj ulici na broju 5, gdje su usljed eksplozije velike granate (tzv. avio-bombe), na nekoliko spratova zgrade oštećeni stanovi, kao i zgrada u ulici Trg djece Dobrinje broj 16 i 20 na Dobrinji.

U prošloj godini završena je obnova zgrade poznate kao „Pancirka“ koja je bila najoštećenija na prostoru Dobrinje, tako da se privodi kraju sanacija objekata sa ratnim oštećenjima u Novom Gradu

Počela sanacija krovova 12 stambenih zgrada

Osim obnove fasada, programom je planirana i popravka oštećenih krovova na dvanest zgrada i to: u ulici Antuna Branka Šimića broj 4 u Starom Hrasnom, Gradačačkoj broj 4 i 6. na Čengić Vili, Prijedorskoj broj 6 na Aneksu, zatim u ulici Safeta Hadžića broj 90 u Švrakinom Selu, Bosanskoj ulici broj 15 na Alipašinom Polju, Trgu Nezavisnosti broj 20 na Alipašinom Polju, Teheranskom trgu broj 7 na Saraj – Polju, u ulici Andreja Andrejevića broj 162, Hakije Turajlića broj 5, Trg Zlatnih Ljiljana broj 10, Salke Nezečića broj 2 i Salke Nezečića broj 14 na Dobrinji. Za sve navedene radove iz budžeta Općine izdvojeno je ukupno 553.000 KM



Izgradnja i sanacija pješačkih staza, stepeništa i trotoara

Završeni su radovi na izgradnji i sanaciji pješačkih staza, trotoara i stepeništa na području općine Novi Grad čime se građanima omogućava lakša i brža pješačka komunikacija, posebno djeci na putu do škole, vrtića, trolejbuskih i autobuskih stajališta.

U blizini Osnovne škole „Ćamil Sijarić“ u naselju Dobrinja izgrađena je pješačka staza koja će djeci iz Aerodromskog Naselja i Dobrinje 5 olakšati put do škole.

U sklopu projekta urađena je rekonstrukcija stepeništa i staze u ulici Hamdije Pozderca

do broja 45 u mjesnoj zajednici „Staro Hrasno“. Nova pješačka staza izgrađena je u Kunovskoj ulici prema trolejbuskoj stanici, kao i stepenište sa rukohvatom iz ulice Emila Zole prema parking u mjesnoj zajednici „Dobrinja C“. U ulici Vejsila Čurčića od broja 23 do broja 75 u Švrakinom Selu sanirani su stepenište i rukohvati, a u mjesnoj zajednici „Alipašino Polje A-1“ izgrađena je nova pješačka staza.

Završena je i sanacija stepeništa koje iz ulice Trg solidarnosti vodi prema školi

„Meša Selimović“, kao i sanacija i izgradnja stepeništa iz ulice Adema Buće kod broja 294 do ulice Sulje Jahića kod broja 26 i do broja 57 u MZ „Dolac“.

Pri kraju je izgradnja novih i saniranje postojećih ograda na stepeništima i zaštitne ograde za pješake u ulicama Safeta Zajke, Aleja Bosne srebrene, Tuzlanskoj, ulici Milana Preloga i dr.

Za navedene radove iz budžeta Općine Novi Grad Sarajevo izdvojeno je 110.000 KM.



Potpisan sporazum za uređenje šetnice i popločanje Bulevara branilaca Dobrinje

Kenan Bukva, šef Odsjeka za komunalne poslove i saobraćajnu infrastrukturu Općine Novi Grad Sarajevo i Maja Bralović - Smith, direktorica građevinske firme „Mibral“ potpisali su okvirni sporazum za izvođenje radova na uređenju šetnice i popločanju Bulevara branilaca Dobrinje.

U proteklom periodu uređeno je oko 760 metara bulevara čime je obogaćen sadržaj centralnog zelenog pojasa žardinjerama i odmaralištima sa klupama u jednom od najvećih novogradskih naselja, a postojeća hortikultura upotpunjena je i novim zelenilom. Kako bi se spriječilo oštećivanje pločnika, postavljene su i fizičke prepreke u cilju onemogućavanja kretanja motornih vozila duž bulevara, od ulice Lava Tolstoja do ulice Senada Poturka Senčija.

U tom dijelu radit će se rekonstrukcija šetnice, u prvoj fazi planirano je 240 metara novog popločanja, a zatim i nastavak izgradnje denivelisane žardinjere sa odmaralištima u dužini od 120 metara čime će biti finalizirano uređenje šetnice na Dobrinji.

Za navedene radove iz budžeta Općine Novi Grad Sarajevo izdvojeno je oko 326.000 KM.

U narednom periodu radit će se i uređenje šetnice uz rijeku Dobrinju, sa sadržajima za odmaranje, sport i rekreaciju.



Centralni trg

Osim uređenja šetališta, u centralnom dijelu Dobrinje u narednom je periodu planirana izgradnja trga koji će nositi naziv „Trg bosansko - američkog prijateljstva“. Bit će to mjesto okupljanja i kulturnih dešavanja u ovom dijelu općine Novi Grad, gdje će se moći održavati muzičke manifestacije, koncerti, kino i pozorišne predstave na otvorenom, te sajamski sadržaji. Urađen je idejni projekat centralnog trga, a u narednom periodu pokrenut će se aktivnosti na realizaciji tog projekta.



Nastavak izgradnje biciklističke staze kroz naselje Dobrinja

Izabran je izvođač radova za izgradnju biciklističke staze kroz naselje Dobrinja kojom će ovo naselje biti povezano sa biciklističkom stazom, koja je u prethodnom periodu izgrađena od Otoke do Nedžarića i od Nedžarića do kružnog toka na Dobrinji. Za izgradnju staze u budžetu je planirano 100.000 KM.

Staza za bicikliste gradit će se u dužini od oko dva kilometra, uradiće se sanacija postojećeg trotoara i obilježavanje biciklističke staze sa pratećom horizontalnom i vertikalnom signalizacijom. U sklopu projekta predviđeno je i obilježavanje biciklističke staze sa pratećom signalizacijom duž A transversale u dužini od dva kilometra.

U okviru navedenih radova bit će postavljene parkovske klupe, korpe za otpatke, a izvršit će se i izmještanje natkrivenih autobuskih stajališta, te izgraditi prelazne rampe za kretanje invalidnih osoba. U posljednje vrijeme primjetan je sve veći broj biciklista koji to prijevozno sredstvo koriste ne samo u rekreativne, već i u transportne svrhe, izgradnjom biciklističke staze u ovom dijelu Novog Grada upotpunit će se ambijent za odvijanje biciklističkog saobraćaja. Osim toga, razvoj biciklističkog saobraćaja u urbanim sredinama pozitivno utiče na zdravlje, ekologiju, a pogotovo na rasterećenje motornog saobraćaja.





Rješavanje problema nedostatka parking prostora

Općina Novi Grad Sarajevo realizira projekat rješavanja problema nedostatka parking prostora u urbanim naseljima koji je posebno izražen u mjesnim zajednicama "Alipašino Polje", "Čengić Vila" i "Aneks", a shodno zahtjevima građana. Time će se djelomično ublažiti dugogodišnji problem stanovnika tih naselja, te spriječiti parkiranje vozila na zelenim površinama i trotoarima. Za tu namjenu iz budžeta za 2018. godinu izdvojeno je oko 252.709 KM.

Parking u Prijedorskoj ulici na Aneksu
Na području mjesne zajednice „Aneks“, u

Prijedorskoj ulici, gdje duži period nedostaje mjesta za parkiranje izgrađen je parking sa 45 mjesta za parkiranje. Njegovom izgradnjom olakšat će se svakodnevni život stanovnika ovog dijela naselja. Na parking u je postavljena horizontalna signalizacija, kako bi se olakšalo parkiranje vozila i uvelo više reda u oblast saobraćaja u mirovanju. Postavljeni su i ivičnjaci, te izgrađene pješačke staze.

Novi parkinzi i na Alipašinom Polju

Novi parkinzi planirani su i u naselju Alipašino Polje u kojem je u vrijeme kada je građeno, bilo znatno manje automobila

u odnosu na današnje, zbog čega je povećana i potreba za dodatnim parking prostorom.

Parking sa 64 mjesta za parkiranje izgrađen je u ulici Trg međunarodnog prijateljstva na Alipašinom Polju. Parking je oivičen, urađena je horizontalna i vertikalna signalizacija. Iscrtavanjem parking mjesta omogućeno je više prostora za parkiranje, a ugradnjom slivničkih rešetki riješena je i odvodnja površinskih voda. U narednom periodu gradit će se još jedan parking na Alipašinom Polju sa oko 40 mjesta, u ulici Trg međunarodnog prijateljstva.

Osigurana nedostajuća sredstva za dovršetak vanjskog uređenja DZ „Novi Grad“



Nakon što su rebalansom budžeta Općine Novi Grad Sarajevo za ovu godinu osigurana finansijska sredstva koja su nedostajala za završetak radova na vanjskom uređenju Doma zdravlja „Novi Grad“ na Otoci, Zavod za izgradnju Kantona Sarajevo potpisao je ugovor sa izvođačem radova, čime su se stekli uslovi da se radovi završe.

„Trenutno se vrše završni radovi u prizemnom dijelu objekta, postavljanje stropova i rasvjete u garažama i na otvorenom parkingu, kao i završni mašinski radovi, te montaža sanitarne opreme unutar objekta. Također, u saradnji sa KJKP Vodovod i kanalizacija u toku je priključivanje Doma zdravlja na novoizgrađene vodovodne i kanalizacione instalacije, nakon čega će se izvršiti izmještanje starih vodovodnih i kanalizacionih instalacija“, potvrdio nam je Asmir Sabljica, direktor za tehničke poslove u firmi „Unigradnja“ koja izvodi radove.

Sabljica je dodao da će se vanjski radovi koji podrazumijevaju tamponiranje i asfaltiranje parkinga i požarnih puteva, te izgradnju prilaznog stepeništa iz ulice Bulevar Meše Selimovića i drugi finalni radovi na vanjskom uređenju moći izvoditi dolaskom povoljnijih vremenskih uslova. Osnovni problem koji je uzrokovao prolongiranje završetka radova bio je nepotpisivanje ugovora od strane

Zavoda za izgradnju Kantona Sarajevo sa izvođačem radova, a koji je obrazlagan time kako nije zatvorena finansijska konstrukcija, kao preduslov za potpisivanje ugovora o izvođenju radova.

Obzirom da su sufinansijeri rekonstrukcije DZ „Novi Grad“ sa vanjskim uređenjem Zavod za zdravstveno osiguranje KS, JU Dom zdravlja KS, Ministarstvo zdravstva KS, Zavod za izgradnju KS i Općina Novi Grad, u 2018. godinu se ušlo sa planom da svaki od sufinansijera obezbijedi pripadajući dio sredstava. Ministarstvo zdravstva KS-a i Općina Novi Grad su osigurali sredstva u budžetima za 2018. godinu, međutim, problem je nastao na relaciji Zavod za izgradnju, JU Dom zdravlja KS i Zavod za zdravstveno osiguranje KS, zbog čega finansijska konstrukcija nije bila zatvorena sa 350.000 KM.

„Sva nastojanja da kantonalne institucije obezbijede neophodna sredstva kako bi se radovi priveli kraju u toku 2018. godine nisu uspjela. Uzimajući u obzir tu činjenicu, te činjenicu da dolazimo do kraja 2018. godine i do promjene strukture Vlade KS-a, općinski načelnik je predložio da se kroz rebalans budžeta osiguraju nedostajuća sredstva od 350.000 KM, kako bi se stekli uslovi da Zavod potpiše ugovor sa izvođačem radova i da se radovi završe“, izjavio je Emir Dedović, pomoćnik općinskog načelnika za finansije.

Obustavljena izgradnja parkinga u ulici Ilije Engela

Izgradnja parkinga bila je planirana i u ulici Ilije Engela, gdje je važećim regulacionim planom planirana izgradnja novog parking prostora, jer je postojeći mali i ne zadovoljava potrebe stanovnika ove ulice, zbog čega su građani primorani svoje automobile ostavljati na trotoarima i ulicama. Međutim, nakon što su provedene sve potrebne procedure, grupa građana spriječila je izvođača radova da započne sa izgradnjom, te su radovi obustavljeni do daljnjeg.

Privredni subjekti u industrijskoj zoni Bačići dobili novu saobraćajnicu



Ovu zimu privredni subjekti u industrijskoj zoni Bačići dočekali su sa potpuno novom saobraćajnicom i infrastrukturom koja je od velikog značaja za njihov rad.

Nakon što su u proteklom periodu obnovljene dvije saobraćajnice u industrijskoj zoni Rajlovac, Rajlovačka cesta i krak Rajlovačke ceste, asfaltirana je i saobraćajnica u industrijskoj zoni Bačići, drugoj po veličini industrijskoj zoni u općini Novi Grad Sarajevo.

Asfaltirano je 270 metara saobraćajnice koja je bila u lošem stanju, a koja sada ima dvije saobraćajne trake i trotoar za pješake. Time je upotpunjena infrastruktura i olakšan svakodnevni rad privrednih subjekata. Za te radove osigurano je 113.772 KM.

Obzirom da je ova industrijska zona na neki način nastajala bez plana i prethodno urađene infrastrukture i vodosnabdijevanja, privredni subjekti su imali dosta problema, tako da je Općina u

saradnji sa Ministarstvom za privredu i Zavodom za izgradnju KS u protekloj godini uradila vodovodnu mrežu koja je koštala oko 320.000 KM. To je bio preduslov da bi se moglo raditi asfaltiranje saobraćajnice, najkritičnijeg dijela kojeg koriste svi privredni subjekti u industrijskoj zoni Bačići.

Aldin Pehilj, rukovodilac prodaje u firmi „Domavija“, koja posluje u ovoj industrijskoj zoni istakao je važnost stavljanja u funkciju saobraćajnice koja je bila u katastrofalnom stanju, što je otežavalo njihov svakodnevni rad.

„Zahvaljujući Općini ova zona je stavljena u punu funkciju, omogućen je normalan pristup našoj proizvodnji, kako uposlenicima, tako i našim kupcima“, kazao je.

Asfaltirana pristupna saobraćajnica pored auto - pijace

Sanacijom i asfaltiranjem makadamskog puta s desne strane Miljacke pored auto - pijace, osiguran je alternativni pristup industrijsko - poslovnoj zoni Telalovo Polje i omogućeno saobraćajno povezivanje sa industrijskom zonom Rajlovac iz još jednog pravca, od TC Wisa prema Rajlovcu.

Asfaltirano je oko kilometar i stotinu metara ceste, kojom će se ovaj dio povezati sa 12. transverzalom i LOT-om 2 Sarajevske zaobilaznice.

Time su poboljšani uslovi saobraćajne komunikacije za privredne subjekte koji su duži vremenski period koristili makadamski put i za razvoj poslovne zone u Telalovom Polju.

U sklopu radova izgrađen je i drenažni sistem, a postavljena je zaštitna ograda duž Miljacke, kao i saobraćajna signalizacija.

Vrijednost radova je 228.000 konvertibilnih maraka, a finansira ih Ministarstvo privrede Kantona Sarajevo namjenskim sredstvima za razvoj poslovnih zona, dok je implementator projekta Općina Novi Grad Sarajevo.



Polupodzemni kontejneri i natkrivene niše zatvorenog tipa

U općini Novi Grad Sarajevo u proteklom periodu izgrađene su nove nadzemne natkrivene niše za smještaj posuda za odlaganje otpada i polupodzemni kontejneri za selektivno odlaganje otpada, takozvani zeleni otoci. Za te radove iz općinskog budžeta izdvojeno je 150.000 KM, a radove je sa 20 posto učešća sufinansirao Fond za zaštitu okoliša FBiH.

Polupodzemni kontejneri i natkrivene niše za smještaj posuda za odlaganje otpada zatvorenog tipa postavljeni su na 15 lokacija na Alipašinom Polju, Dobrinji, u Starom Hrasnom, Olimpijskom Selu, Švrakinom Selu, na Čengić Vili, u Buća Potoku, Briješću, Naselju heroja Sokolje, Dobroševićima i Reljevu.

Također, u toku je realizacija izgradnje natkrivenih niša za smještaj kontejnera sa dvokrilnim vratima, s ciljem smanjenja raznošenja otpada. Uz to se vrši i ugradnja polupodzemnih kontejnera za selektivno odlaganje otpada, koji su se pokazali vrlo efikasnim u mnogim evropskim gradovima, jer omogućavaju skladištenje i do tri puta veće količine otpada, a jedna od najvećih prednosti jeste u tome, što se onemogućava raznošenje otpada, ali i širenje neugodnih mirisa i eventualnih zaraza. Osim toga polupodzemni spremnici zamijenit će dosadašnje kontejnere ispred stambenih zgrada.

Na polupodzemnim spremnicima istaknute su oznake za odlaganje određene vrste otpada, a koji je neophodno razvrstavati za dalje recikliranje. Za odlaganje papira – kartona namijenjene su posude sa plavim poklopcem i naljepnicom, za plastiku sa žutim, dok se ostali miješani otpad odlaže u posude čiji je poklopac sive boje. Polupodzemni kontejneri za prikupljanje papira, plastike i miješanog otpada postavljeni su u ulicama Antuna Branka Šimića kod broja 2 i 4, Geteovoj preko puta broja 14, u ulici Omladinskih radnih brigada do broja 5, Branislava Nušića broj 185 i na spoju ulica Hakije Turajlića i Rudija Alvađa na Dobrinji. Na svim zelenim otocima postavljene su table sa uputstvom za upotrebu, kako bi se građanima olakšalo pravilno odlaganje otpada.



Nakon izgradnje kanalizacione mreže, novi asfalt u ulici Vejsila Čurčića u Švrakinom Selu



Nakon što su završeni radovi na izgradnji separatne kanalizacione mreže u ulici Vejsila Čurčića u Švrakinom Selu, stanovnici padinskog dijela te ulice dobili su i novi asfalt.


Izgrađeno je 300 metara oborinske i 250 metara fekalne kanalizacione mreže, postavljeni su šahtovi i slivničke rešetke, te su individualni stambeni objekti priključeni na novoizgrađenu kanalizacionu mrežu. Za te radove je iz općinskog budžeta izdvojeno 200.000 KM, a time je riješen dugogodišnji problem stanovnika ovog dijela općine Novi Grad Sarajevo koji nisu imali riješenu kanalizacionu mrežu. Po prvi put su riješene i oborinske vode, a nakon tih radova izvršena je temeljita rekonstrukcija kolovoza u dužini od 350 metara.

Prema riječima predsjednika Savjeta Mjesne zajednice „Švrakino Selo - 2“ Bećira Suljevića, stanovnici ovog dijela naselja godinama su imali problem sa improviziranom kanalizacionom mrežom, neriješenim oborinskim vodama koje su se slijevale niz ulicu i prouzrokovale im puno problema, kako ljeti tako i zimi.


„Na radost velikog broja stanovnika, u ovom dijelu ulice riješena je fekalna i kanalizaciona mreža, te je urađeno asfaltiranje ceste što je od velike važnosti za stanovnike ovog dijela naselja. Ovo je nastavak velikog projekta koji se radi fazno. Prije dvije godine urađena je kanalizaciona mreža i asfaltiranje u ulici Kodžina, a u narednom periodu predstoji nam nastavak ovih projekata kako bi cijelo naselje dobilo adekvatnu infrastrukturu“, kazao je Suljević. Dodao je da je u sklopu radova izvršena i sanacija potpornog zida koji osigurava saobraćajnicu, a koji se bio obrušio, kao i novog zida koji je također u funkciji saobraćajnice.



Prije sanacije



Asfaltirana Novopazarska ulica



Stanovnici padinskog dijela Novopazarske ulice, jedne od najdužih naseljskih saobraćajnica koja prolazi kroz gusto naseljene mjesne zajednice Švrakino Selo i Aneks dobili su potpuno novu saobraćajnicu.

Blizu kilometar ceste u potpunosti je rekonstruisan i asfaltiran, dok je na preostalom dijelu od oko 300 metara ceste izvršena sanacija urgentnih oštećenja kolovoza. U sklopu radova je izvršeno nivelisanje i izdizanje šibera i šahtova, kao i ugradnja novih.

Navedenim radovima prethodilo je uklanjanje postojećeg asfaltnog i tamponskog sloja, a u sklopu rekonstrukcije riješen je i problem oborinskih voda koje su ranije pravile dosta problema prilikom padavina.

Također, saniran je i postojeći potporni zid, koji je u funkciji proširenja saobraćajnice u dužini od oko 10 metara, te je izgrađen novi potporni zid, kako bi se stabilizirala škarpa koja se obrušavala na kolovoz.

Novopazarska ulica od vitalnog je značaja za stanovnike navedenih naselja, jedna je od primarnih lokalnih saobraćajnica kojom saobraća javni gradski prevoz, a koja je duži vremenski period bila u lošem stanju.



Prije sanacije



Rekonstrukcija i sanacija lokalnih cesta



Radovima na rekonstrukciji i sanaciji lokalnih i nekategorisanih cesta na prostoru općine Novi Grad Sarajevo koji su završeni u proteklom periodu, između ostalog, obuhvaćene su i ulice koje do sada nisu imale asfalt.

Asfaltiran je dio ulica Ferida Srnje od broja 12-A i Kodžine od broja 127 do 129 u Švrakinom Selu, gdje je ranije bio makadamski put, tako da su stanovnici tih ulica po prvi put dobili asfalt ispred svojih kuća.

Dio ulice Branislava Nušića u mjesnoj zajednici Saraj - Polje također je prvi put asfaltiran. Asfaltirano je oko 200 metara ceste, a tome je prethodila zamjena dotrajalih vodovodnih instalacija i ugradnja slivnika, čime je riješena i odvodnja oborinskih voda.

Urađena je sanacija i asfaltiranje dijela Vrbovske ulice kod broja 75 na Aneksu, gdje je ranije bio makadam, a u sklopu radova riješena je i odvodnja oborinskih voda. U ovoj ulici uređena je i površina za parkiranje vozila.

Asfaltirana je i ulica 14. juna od broja 1 do 19 u naselju Dobroševići, a na ulazu je izgrađen potporni zid i ulica je proširena, a postavljeni su ivičnjaci i slivnici za odvodnju površinskih voda.

Asfalt su dobili i mještani Šehidske ulice u naselju Dobroševići, dok je u ulici Safeta Hadžića, u Starom Hrasnom, izvršena sanacija starog potpornog zida koji se obrušavao tako što je stari zid u potpunosti uklonjen, a na njegovom mjestu izgrađen je novi. Cijelom dužinom zida postavljena je zaštitna ograda. U Dolačkoj ulici do broja 46, u mjesnoj zajednici "Alipašin Most-2", također je urađena sanacija postojećeg potpornog zida i kolovoza.



Proširena saobraćajnica na ulazu u ulicu Bosanskih kraljeva

U okviru radova na rekonstrukciji i sanaciji lokalnih i nekategorisanih cesta na prostoru općine Novi Grad Sarajevo urađena je rekonstrukcija i proširenje kolovoza na ulazu u ulicu Bosanskih kraljeva u Švrakinom Selu, gdje je cesta bila uska, te je bilo otežano mimoilaženje vozila.

Saobraćajnica je proširena na raskrsnici ulica Avde Hodžića, Atife Karalić i Čamila Avdića, a prije toga izvršeno je izmještanje stubova javne rasvjete, nakon čega je saobraćajnica asfaltirana i postavljeni su novi ivičnjaci. Time je riješen dugogodišnji problem mimoilaženja vozila u ovom dijelu naselja.

Urađena je i sanacija dotrajalog asfalta u ulici Senada Poturka Senčija na Dobrinji, postavljeni su novi ivičnjaci, te asfaltiran prostor namijenjen za parkiranje automobila.

Obzirom da se u neposrednoj blizini saobraćajnice nalazi škola, u sklopu ovih radova postavljeni su objekti za smirivanje saobraćaja.



Ulica Ferida Srnje



Potporni zid, ulica Safeta Hadžića



Ulica Vrbovska





Sanirani kolovoz, trotoar i pješačke staze u Gradačačkoj ulici

U sklopu radova na sanaciji i rekonstrukciji lokalnih i nekategorisanih cesta na području općine Novi Grad Sarajevo, pored kolovoza asfaltirane su i pješačke staze, te riješena odvodnja oborinskih voda.

U mjesnoj zajednici Čengić Vila urađena je sanacija kolovoza, trotoara, staza i urgentnih oštećenja u Gradačačkoj ulici kod broja 76. Ulica je asfaltirana u dužini od 120 metara, dok je na preostalom dijelu urađena sanacija udarnih rupa, zatim nivelisanje šibera šahtova i objekata za odvodnju.

Asfaltirane su i pješačke staze na prilazu stambenim zgradama, postavljene klupe za sjedenje i korpe za otpatke, te su uređene zelene površine uz glavni krak ulice i postavljeni novi ivičnjaci. Duž zelenih pojaseva postavljeni su izdignuti ivičnjaci kako bi se onemogućilo parkiranje vozila na uređenim zelenim pojasevima i spriječilo njihovo uništavanje. Završetkom navedenih radova ovaj dio naselja dobio je ljepši izgled, a njegovi stanovnici ugodnije mjesto za stanovanje.



U Boljakovom Potoku svečano otvorena džamija „Takwa“



U ulici Hekim Oglu Ali-paše u Boljakovom Potoku, 20. oktobra 2018. godine, uz prisustvo velikog broja mještana i zvaničnika, svečano je otvorena novoizgrađena džamija koja nosi naziv „Takwa“.

Otvaranju su prisustvovali predstavnici Medžlisa islamske zajednice u BiH glavni imam MIZ-e Sarajevo doc. dr. hfz. Kenan ef. Musić, muftija sarajevski prof. dr. Enes ef. Ljevaković i mr. Sulejman ef. Posavljak, načelnik Općine Novi Grad Sarajevo mr. Semir Efendić, Mahmud Ali, direktor Humanitarne organizacije „Crveni polumjesec UAE“, te predstavnici džamijskog i građevinskog odbora.

Svečanost je učenjem Kur'ana otvorio mladi imam u ovoj džamiji Ademdin ef. Ramić, nakon čega je dobrodošlicu velikom broju prisutnih vjernika poželio imam, hatib i muallim džemata Boljakov Potok mr. Sulejman ef. Posavljak, koji je izrazio zadovoljstvo zbog činjenice da se džamija „Takwa“ može predati vjernicima na upotrebu i da već služi svojoj svrsi, s obzirom da je u mekteb ove džamije već upisano preko 80 polaznika.

Okupljenim vjernicima obratio se i načelnik Semir Efendić, koji je uputio iskrene čestitke povodom otvaranja treće

džamije na području Boljakovog Potoka i na rekordnom roku u kojem je džamija izgrađena.

Glavni imam doc. dr. hfz. Kenan ef. Musić podsjetio je na ulogu Ali-paše Hekim Oglua, po kojem ulica u kojoj je džamija izgrađena nosi naziv, i koji je 1736. godine poveo Bošnjake u odbranu BiH od austrougarskog napada, produživši stoljećima ostatak islama i boravak muslimana na ovim prostorima.

Mještani ovog dijela Boljakovog Potoka, većinom porijeklom iz istočne Bosne, početkom 2000. godine izrazili su želju za gradnjom džamije, s obzirom da im je Centralna džamija bila udaljena.

Izgradnja džamije počela je u septembru 2017. godine, a velika zahvalnost pripada Humanitarnoj organizaciji „Crveni polumjesec UAE“ i njenom direktoru Mahmudu Aliju, kao i vakifama iz UAE gospođi Fatimi Ganim Ibn Hamude i gospođi Salih, supruzi Ganim Ibn Hamude, koje su donirale 220.000 KM za ovu džamiju, ali i vjernicima koji su donirali sredstva kako bi se džamija izgradila.

Tokom svečanosti dodijeljene su i vakufname vakifama i H.O. „Crveni polumjesec UAE“, koja je učestvovala u brojnim projektima u našoj zemlji.

Sanirano veliko oštećenje saobraćajnice u ulici Jusufa Juke Gojaka u Brijesću

U ulici Jusufa Juke Gojaka u naselju Brijesće završeno je asfaltiranje dijela saobraćajnice, gdje je zbog kvara na kanizacionoj mreži došlo do velikog oštećenja ceste, što je mještanima ovog novogradskog naselja uzrokovalo velike probleme prilikom kretanja vozila.

Kenan Bukva, šef Odsjeka za komunalne poslove i saobraćajnu infrastrukturu ističe da je zbog kvara na instalaciji kanizacione mreže, prošle godine oštećeno oko 40 metara ceste, gdje su se formirale udarne rupe i neravnine na kolovozu.

Nakon pregleda instalacija i utvrđivanja problema, oštećena kanizacionu mrežu u potpunosti je zamijenjena i saobraćajnica asfaltirana, čime je riješen problem saobraćajne komunikacije u ovom dijelu općine Novi Grad.



Otvorene nove sportske dvorane u OŠ „Mustafa Busuladžić“ i „Aneks“



U općini Novi Grad Sarajevo otvorene su dvije nove sportske dvorane u osnovnim školama „Aneks“ u naselju Aneks i „Mustafa Busuladžić“ u Dobroševićima.

Moderna sportska dvorana u sklopu škole na Aneksu otvorena je početkom oktobra prošle godine, mjesec nakon stavljanja u funkciju novoizgrađene škole. Radi se o jednoj od najopremljenijih dvorana u Kantonu Sarajevo sa originalnim parketom, na kojem se mogu igrati zvanične utakmice i tribinama sa 300 sjedećih mjesta, tako da djeca imaju prostor za tjelesni odgoj, te održavanje sportskih, kulturnih i drugih manifestacija.

Sportsku dvoranu dobili su i učenici škole u Dobroševićima, prvi put, nakon 60 godina postojanja škole. Njenom izgradnjom stanovnici jednog od najvećih novogradskih naselja dobili su sportski objekat u kojem se obavljaju časovi tjelesnog i zdravstvenog odgoja,

sportska takmičenja i druge sportske aktivnosti.

U novoizgrađenim dvoranama organizirana su i prva takmičenja, u odbojci za djevojčice i košarci za dječake.

Pored ove dvije dvorane, u prethodnom periodu izgrađena je i sportska dvorana u najstarijoj školi na području općine Novi Grad, školi „Behaudin Selmanović“ u Briješću. Ova dvorana nije samo mjesto gdje učenici imaju tjelesni odgoj, nego služi svima onima koji žele da provode svoje slobodno vrijeme baveći se sportskim i kulturnim aktivnostima. U njoj danas utakmice igra RK „Briješće“ i postiže zavidne rezultate.

U toku je izgradnja još jedne sportske dvorane uz školu „Umihana Čavidina“ u naselju Boljakov Potok, njenom izgradnjom dodatno će biti unaprijeđeni uslovi za sport i rekreaciju u Novom Gradu.

OD NAREDNE GODINE STIPENDIJE I ZA DEFICITARNA ZANIMANJA

Ove školske godine Općina stipendira 496 učenika i studenata



Općina Novi Grad Sarajevo u školskoj 2018/2019. godini stipendirat će 496 učenika i studenata, a tim povodom, 14. februara, u multimedijalnoj sali Općine upriličeno je svečano uručenje ugovora stipendistima, uz prigodan kulturno-umjetnički program.

Za tu namjenu iz općinskog budžeta izdvojeno je 450.000 konvertibilnih maraka, od čega će 25.000 KM biti dodijeljeno učenicima i studentima koji postižu vrhunske sportske rezultate.

Prisutnima je dobrodošlicu poželio Općinski načelnik Semir Efendić. Kazao je da Općina svake godine izdvoji oko pola miliona konvertibilnih maraka za stipendije učenicima srednjih škola i studentima fakulteta Sarajevskog univerziteta.


„U narednom periodu dio sredstava za stipendije planiramo izdvojiti i za one učenike i studente koji se obrazuju u bransama koje su deficitarne na tržištu rada.

Time će se i onim učenicima koji se opredjeljuju da završe određene zanate koji su potrebni našem tržištu dati mogućnost da dobiju stipendiju. Oni ranije zbog prosjeka ocjena nisu imali tu mogućnost, a stipendije su uglavnom dobijali učenici gimnazija i drugih škola, sa visokim prosjekom ocjena“, izjavio je načelnik Efendić.

Učenici srednjih škola mjesečno će primati po 75 KM, a studenti po 100 KM, isplata će se vršiti retroaktivno za deset mjeseci.



Prijem za učenike, osvajače zlatnih medalja na međunarodnom takmičenju inovacija u Zagrebu



Učenici Srednje elektrotehničke škole u Sarajevu usmjerenja elektronika i automatika su ponos svoje škole, ali i BiH. Već godinama osvajaju zlatne medalje u inovacijama, a njihovi izumi su vrijedni pažnje najpoznatijih svjetskih kompanija. Zlatne medalje osvojili su i na nedavno održanom međunarodnom takmičenju inovacija u Hrvatskoj, gdje su predstavili robot „rover“, zatim „smart drill“ i „sorter otpornika.

Tim povodom načelnik Općine Novi Grad Sarajevo Semir Efendić upriličio je prijem za osvajače zlatnih medalja u čijoj su pratnji bili i direktor škole Faruk Kurtović, zamjenik direktora Fahrudin Alihodžić i Adnan Akšamović, profesor stručne teorijske nastave i laboratorijskog rada koji pomaže učenicima da svoje ideje realiziraju.

Tom prilikom kreatori inovacija predstavili su neke od svojih izuma, a nakon toga posjetili su Centar za obuku za rad na CNC mašinama koji je nedavno otvoren u jednom od objekata u sklopu Centra „Safet Zajko“. Radi se o visokim tehnologijama u proizvodnji CNC mašina koje su kreirane od strane naših ljudi.

Prilikom posjete Općini Novi Grad direktor Kurtović zahvalio je općinskom načelniku na prijemu, istakavši da na taj način iskazuje poštovanje prema školi koja još od 2004. godine radi inovativne radove.

„Naša škola svake godine učestvuje na državnim takmičenjima, a isto tako i na izložbama koje organizira zajednica inovatora Hrvatske. Na ovogodišnjoj izložbi u Hrvatskoj učestvovalo je 28 zemalja iz cijelog svijeta, gdje je naša

škola predstavljala državu BiH. Naši učenici su predstavili tri rada i osvojili tri zlatne medalje, kao i posebnu nagradu od kanadskog žirija za najbolju inovaciju i najbolje prezentovanje“, kazao je direktor Kurtović.

Haris Džananović, učenik 4. razreda predstavio je robot „rover“ koji je rađen po uzoru na jedan NASA-in robot koji u svakom momentu može nastaviti da se kreće, bez obzira pod kojim je uglom.

Profesor Admir Akšamović izuzetno je ponosan na svoje učenike, jer su tokom takmičenja dobili sve pohvale međunarodnih takmičara i žirija, te ističe kako je upravo to, uz medalje, pokazatelj da su njihovi učenici kvalitetni i spremni za rad.

Potpisani sporazumi za sufinansiranje prevoza učenika sa poteškoćama u kretanju



Općina Novi Grad Sarajevo duži vremenski period u kontinuitetu realizira projekat finansiranja prevoza učenika sa posebnim obrazovnim potrebama i poteškoćama u kretanju i njihovih pratilaca.

Tim povodom je u zgradi Općine, 20.februara, upriličeno potpisivanje sporazuma o sufinansiranju prevoza učenika sa poteškoćama u kretanju i njihovih pratilaca sa područja općine Novi Grad sa pet specijaliziranih ustanova. Ovim projektom obuhvaćeno je 112 djece i 39 njihovih pratilaca za šta je Općina u budžetu za 2019. godinu planirala 70.000 KM, a dio sredstava za navedene namjene Općini će refundirati resorno kantonalno ministarstvo.

„Iako smo prošle godine prilikom potpisivanja sporazuma o finansiranju prevoza učenika sa poteškoćama u kretanju najavili završetak saradnje u ovoj oblasti, jer je u skladu sa novim zakonima o osnovnom i srednjem obrazovanju finansiranje učenika sa poteškoćama u kretanju preuzelo Ministarstvo obrazovanja, nauke i mladih i ove godine sa specijaliziranim institucijama potpisujemo sporazume obzirom da navedenim zakonskim rješenjima nisu definisani korisnici i procedure, tako da će Općina i u narednom periodu provoditi aktivnosti na realizaciji ovog projekta“, kazala je Adisa Šuman, pomoćnica načelnika u Službi za obrazovanje, kulturu i sport.

Naglasila je da će Općina i dalje nastaviti finansirati troškove prevoza naših najmlađih sugrađana sa poteškoćama u kretanju predškolskog uzrasta, ali i studente sa poteškoćama u kretanju koji nisu obuhvaćeni postojećim zakonskim rješenjima, niti su za iste obezbijedena sredstva u budžetu Kantona Sarajevo. To je jedan od načina da im pomognemo u svakodnevnom kretanju do škole i nazad.

Inga Bišćević, direktorica Škole za srednje stručno obrazovanje i radno osposobljavanje istakla je značaj ove vrste podrške za nastavni proces, odnosno redovno pohađanje nastave.

Kazala je da ovu ustanovu pohađa 85 učenika, te da je 15 sa područja općine Novi Grad. Također je istakla da je vrlo važno da i roditelji imaju priliku da im se obezbijedi prevoz, jer jedan dio učenika nije samostalan i potrebna im je pratnja.

Besplatne sekcije violine, gitare, klavira u Centru za kulturu na Dobrinji

Najmlađi stanovnici Općine Novi Grad Sarajevo i ove školske godine imaju mogućnost pohađanja besplatnih radionica u Centru za kulturu na Dobrinji, gdje se održavaju časovi klavira, violine i gitare, te dramska, likovna i foto - video radionica za djecu i omladinu.

Za rad sa polaznicima su angažirane stručne i kompetentne osobe koje svojom kreativnošću i posvećenošću svakom od polaznika pristupaju na individualan način. Časove klavira, violine i gitare vode Mirza Kovač, Nejra Kovač i Mehmed Mehić, a dramsku i muzičku radionicu Davor Golubović. Likovnu sekciju vodi Smajil Čar, a radionicu fotografije i videografije Hari Šečić.

Osim ugodnog prostornog ambijenta u Centru za kulturu, za rad sekcija obezbijede su i muzički instrumenti. Termini održavanja časova usklađeni su sa obavezama učenika. Polaznici će nakon završetka imati mogućnost da na prigodnoj priredbi, likovnoj izložbi, književnoj večeri i dramskim nastupom iskažu šta su naučili i postigli radom u okviru radionica.

U nastojanju da se kulturni život u općini Novi Grad unapređuje, Općina je u proteklom periodu preuredila historijski objekat - vilu Hadžihalilovića i stavila je u funkciju našim građanima.

U ovom lijepo uređenom prostoru se održavaju različite izložbe, koncerti, teatarske predstave, promocija knjiga, poetske večeri itd. Na raspolaganju je omladini zainteresiranoj za umjetnost, obrazovanje i kulturu.



Više od hiljadu novogradskih đaka posjetilo institucije kulture



Učenici sedmog razreda osnovnih škola s područja općine Novi Grad posjetili su institucije kulture sa kojima Općina Novi Grad Sarajevo ima potpisan sporazum o saradnji u oblasti umjetnosti, kulture i obrazovanja.

U periodu od 12. do 19. decembra 2018. godine, 1.100 učenika iz 15 škola u pratnji nastavnika i predstavnika Službe za obrazovanje, kulturu i sport posjetili su Brusa bezistan, Gazi Husrev-begovu biblioteku, Bošnjački institut - Fondacija Adila Zulfikarpašića i Zemaljski muzej.

Prilikom posjete učenici su imali priliku vidjeti kulturno blago koje se čuva i upoznati se o važnosti kulturne baštine Grada Sarajeva i BiH, gdje su kustosi održali predavanje i upoznali ih sa izložbenim postavkama i kulturnim nasljeđem. Na taj način učenici su proširili znanje o znamenitostima institucija koje su od kulturnog i historijskog značaja za Grad Sarajevo.



Učenci novogradskih osnovnih škola posjetili Memorijalni centar Srebrenica - Potočari



Hiljadu i stotinu šezdeset učenika osnovnih škola s područja općine Novi Grad Sarajevo, u pratnji direktora i nastavnika, sa predstavnicima Službe za obrazovanje, kulturu i sport Općine Novi Grad, u novembru 2018. godine, posjetilo je Memorijalni centar Srebrenica - Potočari i mezarje, gdje su odali počast žrtvama genocida počinjenog u julu 1995. godine.

Posjeta je organizirana u saradnji Općine i osnovnih škola, a projekat se realizirao u skladu sa godišnjim programima rada općinske službe i novogradskih osnovnih škola. Cilj je upoznati učenike sa događajima vezanim za period agresije na našu zemlju i genocid počinjen nad stanovnicima Srebrenice.

Djeca su obišla mezarje u Potočarima, a potom je održan historijski čas o onome što se dešavalo u Srebrenici u proteklom ratu i masovnim stradanjima Srebreničana u julu 1995. godine. Nakon historijskog časa praćenog filmskom projekcijom, obišli su muzej, gdje su pogledali stalnu postavku izložbe "Srebrenički genocid - neuspjeh Međunarodne zajednice", koja hronološki opisuje život tokom rata u Srebrenici, genocid i posljedice genocida počinjenog u ovom bh. gradiću.

Također su obišli i spomen - sobu u kojoj su izložene slike predmeta pronađenih u masovnim grobnicama, a koji se nalaze među stvarima koje su tokom zadnjih godina nađene u masovnim grobnicama. Te lične sitnice ubijenih odraslih muškaraca i dječaka približavaju njihovu sudbinu koja ih je zadesila u julu 1995. godine, kada je mučki ubijeno više od 8.000 Bošnjaka odraslih muškaraca i dječaka.





Potpisan sporazum za nastavak škole planinarenja

Općina Novi Grad Sarajevo u saradnji sa Planinarskim sportskim društvom „Zlatni ljiljan“ od 2017. godine realizira projekat planinarske škole pod nazivom „Planinarska družina - edukacija kroz planinarsku školu“. Projekt će biti nastavljen i u ovoj godini, a tim povodom u zgradi Općine potpisan je sporazum o njegovoj realizaciji kojeg su potpisali Tajib Delalić, pomoćnik načelnika za boračka pitanja, rad, socijalna pitanja i zdravstvo i Sado Šatrović, predsjednik Upravnog odbora PSD „Zlatni ljiljan“.

Tajib Delalić, istakao je značaj ovog projekta kojim će se djeci novogradskih škola omogućiti boravak na planinskom zraku, a uz to će djeca imati priliku na poseban način osjetiti prirodne ljepote i sve ono pozitivno što imaju naše planine. Dodao je da su provedene aktivnosti oko uvođenja ovog projekta u osnovne škole na području Sarajevskog kantona kao obaveznog časa

za sedmi razred osnovnog obrazovanja.

„Došli smo do faze da je taj prijedlog odobren od strane Ministarstva obrazovanja, nauke i mladih KS, ali još nije prošao proceduru Vlade i Skupštine Kantona Sarajevo, tako da mislim da će planinarenje ubuduće biti jedan od obaveznih časova u sedmom razredu osnovne škole. PSD „Zlatni ljiljan“ izdalo je udžbenik koji je jedan od boljih vodiča za planinarenje i poslužit će za edukaciju iz ove oblasti, kako bi djeca naučila aktivnosti koje smo mi potpuno izgubili, kao što su snalaženje u prirodi, pješaćenje, snalaženje u prostoru, da se mogu orjentisati i sami sebi pomoći itd.“, kazao je Delalić, istakavši da je veliki broj djece zainteresiran za planinarenje.

„Projekat je započet 2017. godine, a uključene su osnovne i srednje škole s područja Novog Grada. Obuhvata edukaciju iz osnova planinarstva i praktičnu nastavu.

U prvom ciklusu učestvovalo je oko 500 đaka za koje smo organizirali četiri izleta i kampovanje. Planirali smo da u 2019. godini oko 300 dječaka i djevojčica prođe kroz ovaj projekat“, rekao je Šatrović.

Svake godine od 300 do 500 dječaka i djevojčica od sedmog do devetog razreda osnovne i do drugog razreda srednje škole s područja Novog Grada prođe školu planinarenja.

Projekat „Planinarska družina - edukacija kroz planinarsku školu“ je aktivnost kojom se nastoji uticati na podizanje svijesti o potrebi čuvanja zdrave životne sredine i značaju boravka na čistom planinskom zraku, te na inovativan način pobuditi i ojačati svijest o okolišu kroz afirmaciju planinarstva, kao i razvijanje potrebe za ovom vrstom sporta i rekreacije. Za realizaciju škole planinarenja u 2019. godini iz budžeta Općine izdvojeno je 35.000 KM.

Više od 300 novogradskih planinara boravilo na Bjelašnici

U okviru realizacije projekta „Planinarske družine - edukacija kroz planinarsku školu 2018“ kojeg Općina Novi Grad Sarajevo provodi u saradnji sa Planinarskim sportskim društvom „Zlatni ljiljan“ na Bjelašnici je boravilo 338 učesnika planinarskih družina novogradskih osnovnih i srednjih škola.

„Nakon okupljanja na Babinom dolu, planinarska kolona učenika krenula je do Štinjeg Dola i „Kuće spasa“, gdje su učesnici raspoređeni u dvije grupe. Jedna grupa popela se na vrh Bjelašnice (opservatorij)

na 2.067 metara nadmorske visine, dok je druga grupa pohodila vrh Javorak na 1.681 metar nadmorske visine“, kazao je sekretar Planinarskog društva „Zlatni ljiljan“ Zakir Šogolj.

Tom prilikom održane su edukacije iz geografske i topografske orijentacije sa osvrtom na bližu i dalju okolinu, kao i predavanja o opasnostima u planini i životnoj sredini - okolišu, a predavači su bili Armin Adžem i Zakir Šogolj.



“Između dvije imperije, BiH na fotografijama Františka Topiča 1885-1919”



Početkom novembra prošle godine posjetio općine Novi Grad imali su priliku pogledati izložbu Zemaljskog muzeja BiH pod nazivom „Između dvije imperije, Bosna i Hercegovina na fotografijama Františka Topiča 1885-1919.“.

Predstavljeno je 38 fotografija koje svjedoče o načinu života u periodu kada su se u BiH prelamali interesi ondašnjih evropskih kolonijalnih sila.

Zemaljski muzej BiH od svog osnivanja, uz osnovnu muzeološku i naučnoistraživačku djelatnost na poljima arheologije, etnologije i prirodnih nauka, sistematski prikuplja, obrađuje i arhivira fotografije, negative i filmove, te je nezaobilazna baza i početna tačka za svako ozbiljnije istraživanje historije fotografije u Bosni i Hercegovini. Unutar te ogromne baze najistaknutije mjesto zauzima raritetna zbirka sa više od 6.000 negativa na staklenim pločama koja datira iz vremena kraja 19. i početka 20. stoljeća.

Kao najveći i sadržajno najvažniji dio navedene zbirke izdvaja se korpus od oko 5.000 negativa objedinjen potpisom jednog od najistaknutijih pionira fotografije u Bosni i Hercegovini – Františka Topiča, Čeha koji je dobar dio svoga radnog vijeka proveo u Zemaljskom muzeju BiH, prvo kao arhivski činovnik, a potom i kao bibliotekar, sekretar i fotograf.

Topičeve fotografije, evidentira kako muzejske predmete tako i cijeli niz društvenih i prirodnih fenomena, interijera i eksterijera, profanih i sakralnih objekata, posebnu važnost imaju i scene iz svakodnevnog života, prvenstveno ljudska lica.

Izložba rukopisnog blaga Gazi Husrev-begove biblioteke “Blago koje traje”



Posjetio Galerije Općine Novi Grad imali su priliku pogledati izložbu rukopisnog blaga iz fundusa Gazi Husrev-begove biblioteke koja nosi naziv “Blago koje traje”.

Izložba je otvorena u povodu obilježavanja 480 godina postojanja Gazi Husrev-begove biblioteke. Izložba slikom i riječju predstavlja duhovno i kulturno bogatstvo koje ova institucija kontinuirano stoljećima čuva. Dio izložbe odnosi se na historijat Biblioteke i njenog osnivača Gazi Husrev-bega, dok drugi dio izložbe predstavlja rukopise koji su nastajali u različitim krajevima u periodu između 12. i 20. stoljeća. Čine je raritetni i unikatni rukopisi iz svih nauka koje su se izučavale u vrijeme njihovog nastanka, kao što su djela iz medicine, matematike, astronomije, astrologije, filozofije, logike, književnosti, historije, geografije..., kao i djela enciklopedijskog karaktera.

Dio izložbe su bili i rukopisi bosanskih autora, koji su, također, pisali naučna djela iz svih naprijed spomenutih oblasti na arapskom, turskom i perzijskom jeziku, kao i djela koja su prepisivali bosanski prepisivači u mnogim bosanskohercegovačkim gradovima i selima, ali i u drugim dijelovima Osmanskog carstva. Također, tu su i rukopisi koji se po ukrasima, ornamentici i umjetničkom dojmu mogu ubrojati u remek-djela i biserje orijentalne kaligrafije. Tu, prije svega, spadaju džuzevi Mehmed-paše Sokolovića, Mushaf Fadil-paše Šerifovića, Hafizov Divan pjesama s minijaturama i na desetine primjeraka luksuzno ukrašenih mushafa, zbirki dova i divana poezije na turskom i perzijskom jeziku.



Predstava "Brašno u venama" oduševila publiku



U multimedijalnoj sali Općine, odigrana je predstava "Brašno u venama" u režiji Borisa Liješevića, rađena po tekstu Igora Štiksa". Predstava govori o emocionalnom i ideološkom jazu generacija i suočavanju sa prošlošću kao bitnim segmentom budućeg života. "Brašno u venama" je predstava o porodici koju je rat rasuo po svijetu, a koja se poslije više od 20 godina susreće u jednom gradu, jednom stanu, u jednoj noći.

U predstavi su igrali Miki Trifunov, Kaća Dorić, Izudin Bajrović, Admir Glamočak, Selma Alispahić i Jasenko Pašić. Dramaturgiju predstave potpisuje Dubravka Zrnčić-Kulenović, scenografiju Vedran Hrustanović, kostimografiju Lejla Hodžić, dok je autor muzike Duško Šegović. Kooprodukciju predstave potpisuje Sarajevski ratni teatar i Internacionalni teatarski festival MESS- Scena MESS.



80. godina od smrti Džemaludina Čauševića



Otvaranjem izložbe „Džemaludin Čaušević: prosvjetitelj i reformator“, koja je bila otvorena u izložbenom prostoru u zgradi Općine Novi Grad, obilježeno je osamdeset godina od smrti istaknute ličnosti koja je ostavila neizbrisiv trag u bosanskohercegovačkoj historiji, kulturi i politici.

Izložba je organizirana u saradnji sa Bošnjачkim institutom - Fondacija Adila Zulfikarpašića u okviru projekta „Ime moje škole“. Glavni eksponati izložbe su bronzana bista Džemaludina Čauševića, djelo najznačajnijeg hrvatskog kipara Ivana Meštrovića, originalno izdanje Kur'an Časnog iz 1937. godine i izdanja periodika sa početka 20. stoljeća u kojima je Čaušević objavljivao tekstove. Sadrži i segmente koji se odnose na lik i djelo Džemaludina Čauševića, ispričane i grafički predstavljene na interesantan način, prijemčiv za učenike.

Izložbu je otvorila Amina Rizvanbegović Džuvić, direktorica Bošnjачkog instituta, a prisutnima se obratila i Fahra Zvizdić, šefica Odsjeka za obrazovanje i kulturu Općine Novi Grad Sarajevo.



Otvaranju su prisustvovali i učenici Osnovne škole koja od 1994. godine ponosno nosi ime bošnjачkog velikana Džemaludina Čauševića.

Hadži Mehmed Džemaludin ef. Čaušević rođen je 1870. godine u mjestu Arapuša kod Bosanske Krupe. Nakon završetka Bihačke medrese, školovanje nastavlja u Istanbulu gdje studira pravo, književnost, teologiju, filozofiju, misticizam i historiju. Od 1903. do 1905. godine nastavnik je arapaskog jezika u Velikoj gimnaziji u Sarajevu, kada je izabran za člana Ulema-medžlisa. Iste godine napravio je konačnu reformu arebice za potrebe pisanja bosanskim jezikom. Izabran je za reisu-l-ulemu 1913., a svečano ustoličen naredne godine. Ostavku je podnio 1930. godine, nakon čega se posvetio prevodenju Kur'an na bosanski jezik. Knjiga naslovljena Kur'an Časni: prevod i tumač, objavljena je 1937. – godinu dana prije Čauševićeve smrti. U listu Novi behar (1938), stoji zabilježeno kako mu je obavljena „impozantna dženaza kakvu Sarajevo ne pamti.“

Izložba fotografija starih bosanskih nišana "Posuđeno vrijeme"

Izložba umjetničkih slika pod nazivom "Posuđeno vrijeme" mogla se pogledati u oktobru 2018. godine u galerijskom prostoru Općine Novi Grad.

Predstavljene su fotografije starih bosanskih nišana kao posebnih zapisa i svjedoka o našoj bogatoj kulturnoj prošlosti. Nišani su različitih oblika i veličina, a nastali su tokom 17. i 18. stoljeća diljem Bosne i Hercegovine. Pored toga što se javljaju kao posebni svjedoci naše kulturne baštine, ovi kameni spomenici predstavljaju nezaobilazan materijal za proučavanje naše historije. Oni su izvor dragocjenih podataka, svjedoci pismenosti i bogate klesarske tradicije na ovim prostorima, zbog čega ih često nazivamo kamenim bibliotekama ili arhivima na otvorenom.

U prvom dijelu izložbe predstavljene su fotografije nišana iz različitih dijelova Bosne i Hercegovine, poput Sarajeva, Travnika, Mostara, Bihaća, kao i fotografije koje su nastale u Turskoj. Autor izloženih fotografija je Faruk Ibrahimović, nosilac zvanja majstor fotografije Asocijacije za umjetničku fotografiju u Bosni i Hercegovini, član Američkog fotografskog društva (PSA), te dobitnik mnogobrojnih nagrada i priznanja za fotografiju. Danas se njegove fotografije nalaze u galerijama, muzejima i privatnim zbirkama u Australiji, Austriji, Finskoj, Mađarskoj, Norveškoj, SAD, Švedskoj, Turskoj i Velikoj Britaniji.

U drugom dijelu izložbe izložene su originalne fotografije iz fotoarhiva Gazi Husrev-begove biblioteke. Riječ je o fotografijama nadgrobničkih spomenika istaknutih bosanskohercegovačkih velikana, poput: Mehmeda Mejlije, Džemaludina Čauševića, Safvet-bega Bašagića, Mehmeda Spahe, Rešada Kadića itd. Također, izložene su i stare fotografije sarajevskih mezarja (Alifakovac, Kovači, Grlića brdo...) kao i fotografije stećaka u Sarajevu i njegovoj okolini.





U Centru za kulturu na Dobrinji upriličena večer tradicionalne iranske muzike



Povodom obilježavanja Dana kulture Irana i 40. godišnjice Nacionalnog dana Irana u Centru za kulturu na Dobrinji – vila Hadžihalilovića, 13. februara, upriličena je večer iranske tradicionalne muzike uz prisustvo predstavnika ambasade Islamske Republike Iran u BiH i iranskog grada Kazvina, koji borave u posjeti BiH i Općini Novi Grad, te mnogobrojne publike.

Publika je uživala u tonovima muzičkih instrumenata nejj, kombak i santur, na kojima su muzički umjetnici izvodili perzijsku poeziju protkanu notama. Publici se predstavila muzička grupa „Farhang” iz grada Kazvina, koja je učestvovala na brojnim međunarodnim muzičkim festivalima u Španiji, Kataru, Meleziji, Hrvatskoj itd”, čiji članovi nastoje očuvati i njegovati tradicionalnu iransku muziku. Muzičku grupu predvodio je Mohammad Hossein Yazdi (tombak), a čine je i Sejed Ali Husejni (nejj), Purja Bahtuj (santur) i Izetulah Kakavandi (vokal).

Prisutnima je dobrodošlicu poželio načelnik Općine Novi Grad Sarajevo Semir Efendić koji je izrazio zadovoljstvo saradnjom između Kulturnog centra IR Iran i Općinske službe za obrazovanje,

kulturu i sport, te Centra za kulturu Dobrinja u sklopu koje je organiziran koncert.

„Iranska, odnosno perzijska kultura jedna je od najvećih svjetskih civilizacija i kultura i sretni smo da jedan dio te kulture imamo priliku vidjeti ovdje u Novom Gradu, a nadam se da ćemo i u budućnosti ovu saradnju nastaviti i građanima predstaviti sve ljepote umjetnosti koje je stvorio narod Irana u vremenu koje je iza nas”, rekao je načelnik Efendić.

Prisutnima se obratio i Hossein Nouri, ataše za kulturu Kulturnog centra ambasade IR Iran u BiH. Nouri je u svom obraćanju istakao zadovoljstvo toplim prijemom u općini Novi Grad. Zahvalio je načelniku Semiru Efendiću što je prepoznao iransku kulturu i pokazao interes da zajednički sarađuju i da to prikažu građanima. „Ove godine je 40. godišnjica islamske revolucije u Iranu, naš tradicionalni Dan, to je za nas poseban dan i zbog toga smo pozvali posebnu muzičku grupu iz Irana”, rekao je Nouri.

„Predsjednik izbliza“



Povodom obilježavanja 15. godišnjice smrti prvog predsjednika BiH rahmetli Alije Izetbegovića u Galeriji Općine Novi Grad otvorena je izložba fotografija "Predsjednik izbliza" koja ima za cilj da na što slikovitiji način približi javnosti lik i djelo prvog predsjednika Bosne i Hercegovine, kao državnika i običnog građanina.

Izložbu je otvorio Adnan Žiško, direktor JU Muzej "Alija Izetbegović", a otvaranju su prisustvovali kulturni djelatnici, predstavnici institucija kulture, kao i makedonski umjetnik Agron Salju, čija su umjetnička djela također izložena u galerijskom prostoru Općine Novi Grad, te učenici novogradske Osnovne škole "Fatima Gunić" i Srednje tehničke škole grafičkih tehnologija dizajna i multimedije sa Ilidže.

Jedan dio izložbe je vizuelni prikaz privatnog i političkog života predsjednika Izetbegovića iz jedne potpuno drugačije perspektive, a najvećim dijelom fundus fotografija šira javnost nije imala priliku do sada vidjeti.

U drugom dijelu je predstavljena izložba mladog makedonskog umjetnika Agrona Salju pod nazivom "Šahid/šehid vremena".

Izložba „A onda odjeknu onaj hitac u Sarajevu...“



Posjetioci Galerije Općine Novi Grad početkom decembra 2018. godine imali su priliku pogledati izložbu Historijskog muzeja BiH pod nazivom „A onda odjeknu onaj hitac u Sarajevu...: Prvi svjetski rat i Bosna i Hercegovina“.

Izložbu je muzej pripremio za stogodišnjicu početka Prvog svjetskog rata 2014. godine u saradnji sa Imperijalnim ratnim muzejom iz Londona i u partnerstvu sa British Councilom Bosne i Hercegovine. Temeljena je na istraživanju arhivske građe iz domaćih arhiva i fotografskog materijala Imperijalnog ratnog muzeja iz Londona. Prati razvoj Sarajeva na prijelazu dva stoljeća i smjene dva carstva na području Bosne i Hercegovine, atentat u Sarajevu koji je označio kraj jedne epohe i ulazak u svjetski rat, stanje na ratištima na raznim svjetskim frontovima, a u centralnom dijelu se bavi pitanjem kako je rat uticao na život u Bosni i Hercegovini.

Korišteni arhivski materijal predstavlja potpuno novu i dotad nekorisćenu građu u bavljenju historijom Bosne i Hercegovine, a time i osvježene u bosanskohercegovačkoj historiografiji i muzeologiji.

Tokom trajanja izložbe Historijski muzej Bosne i Hercegovine i Općina Novi Grad Sarajevo zajednički su organizirali niz radionica prilagođenih različitim uzrastima, za škole sa područja općine Novi Grad. Radionice nose nazive :“Što nam govori dječak sa fotografije”, “Historijske osmice - 1918” i “Kustos na jedan dan”. Učenici su imali jedinstvenu priliku vidjeti i slikati se pored replike automobila kojim se vozio prestolonasljednik Franc Ferdinand u momentu kada je izvršen atentat, a koja je bila postavljena ispred zgrade Općine Novi Grad.



Posjeta Udruženju „Oaza“



Načelnik Općine Novi Grad Sarajevo Semir Efendić i pomoćnik načelnika za boračka pitanja, rad, socijalna pitanja i zdravstvo Tajib Delalić posjetili su Udruženje "Oaza" za podršku osobama s intelektualnim teškoćama na području Kantona Sarajevo koje od 2005. godine djeluje na području općine Novi Grad Sarajevo.

Sa izvršnim direktorom Udruženja Arminom Smajlovićem i Midhatom Karahmetom, predsjednikom Upravnog odbora Udruženja razgovarali su o radu i djelovanju Udruženja, te su obišli prostorije dnevnog centra, u kojima se svakodnevno realiziraju različite kreativne radionice.

Posjeta je bila i prilika za druženje sa korisnicima koji kroz osam različitih radionica izrađuju ramove za slike, sapune, svijeće, čestitke, raznovrsne keramičke predmete i sl.

Tom prilikom domaćini su zahvalili predstavnicima Općine Novi Grad na dosadašnjoj uspješnoj saradnji i velikoj podršci koju ova lokalna zajednica pruža radu sa osobama sa intelektualnim teškoćama.

„Općina Novi Grad je pozitivan primjer jedne lokalne zajednice koja vodi računa o brizi osoba sa intelektualnim teškoćama i jedna je od prvih lokalnih zajednica koja je prepoznala značaj rada sa osobama sa invaliditetom“, kazao je direktor Smajlović, istakavši odličnu saradnju i sa JP „Lokom“ koje upravlja sportskim objektima u vlasništvu Općine Novi Grad.

Prilikom posjete razgovarano je i o programskim sportskim aktivnostima. Istaknuta je važnost projekta „Sportske igre Oaze“, a koji se već nekoliko godina realizira u sportskoj dvorani „Ramiz Salčin“ na Mojmilu i okuplja veliki broj osoba sa poteškoćama u razvoju iz BiH i zemalja regiona.

Srednjovjekovni stećci u parku ispred zgrade Općine Novi Grad



Dva srednjovjekovna nadgrobna spomenika - stećka, koja su bila smještena u krugu parkinga trolejbuskog terminala KJKP „Gras“, takozvani lokalitet Kakanj - Švrakino Selo, izmještena su u park ispred zgrade Općine Novi Grad Sarajevo.

Ova aktivnost provedena je u saradnji sa JU „Muzej Sarajeva“ u okviru projekta „Kulturno - historijsko naslijeđe na prostoru Sarajeva sa posebnim interesom za Općinu Novi Grad“, a uz saglasnost Zavoda za zaštitu kulturno historijskog i prirodnog naslijeđa Kantona Sarajevo.

Stećci i dalje ostaju u blizini izvornog lokaliteta sa kojeg su usljed radova na izgradnji trolejbuskog terminala već ranije dislocirani. Naredna faza ovog projekta je zaštita i konzervacija nadgrobničkih spomenika, te uređenje parkovske površine kao dijela arheološkog parka.

Projekat se provodi s ciljem promocije kulturno - historijskog naslijeđa, te zaštite od dalje devastacije i upoznavanja šire javnosti o postojanju srednjovjekovnih nadgrobničkih spomenika na području općine Novi Grad Sarajevo.

Nekropola datira iz srednjeg vijeka, a 1991. godine prilikom vršenja arheološkog istraživanja na lokalitetu Kakanja pronađeno je šest grobnih mjesta. Nalazi su izmješteni u Zemaljski muzej, a dva preostala stećka su prenesena na lokaciju Kakanj - Švrakino Selo, tj. trolejbuski terminal u blizini zgrade Općine.



Otvorena nova zgrada Nogometnog saveza BiH

U općini Novi Grad Sarajevo, 22. novembra 2018. godine, svečano je otvorena nova zgrada Nogometnog/fudbalskog saveza Bosne i Hercegovine. Otvaranje sjedišta kuće bh. fudbala ozvaničili su predsjednik Evropske nogometne asocijacije (UEFA) Aleksandar Čeferin i prvi čovjek bh. nogometa Elvedin Begić. Svečanom otvaranju prisustvovao je i načelnik Općine Novi Grad Sarajevo Semir Efendić, te brojni zvaničnici, predstavnici UEFA-e i FIFA-e, sportski radnici i drugi gosti.

Nakon zvaničnog dijela upriličen je zajednički obilazak zgrade, a tom prilikom gostima je predstavljen i idejni projekat nacionalnog stadiona koji bi se gradio na području Novog Grada, za koji je Općina već obezbijedila lokaciju. Stadion koji bi se gradio bio bi kapaciteta 30.000 sjedećih mjesta, uz prateće sadržaje, spadao bi u četvrtu kategoriju koja ispunjava sve uslove za odigravanje utakmica pod okriljem FIFA-e i UEFA-e uključujući i susrete Lige prvaka.

Predsjednik UEFA-e Aleksandar Čeferin kazao je, između ostalog, da je otvaranjem kuće nogometa BiH bogatija za jedan novi sportski objekat, te da ovaj čin predstavlja novi korak razvoja nogometa.

„Svijet se ovih dana divi rezultatima bh. reprezentacije koja se plasirala u grupu A lige nacije. Uspjeh nije došao preko noći, već marljivim radom, BiH je jedan od lidera u Evropi po broju organiziranih turnira za mlade, a potvrda dobrog rada s mladima je da je bh. kadetska reprezentacija igrala tri puta završnicu na EP“, istakao je Čeferin.

Također je kazao da BiH ima talent, perspektivu i rukovođenje, igrače i trenere, ali izuzetno lošu infrastrukturu. Dodao je da će UEFA ostati pouzdan partner NS BiH, posebno u infrastrukturnom segmentu. „Bez infrastrukture nema napretka, ali bitni su i gledatelji i oni zaslužuju da gledaju utakmice na dobrim stadionima, gdje mogu uživati u nogometnoj predstavi“, rekao je Čeferin.



UZ PODRŠKU VLADE ŠVICARSKE I GOPA MBH

U Centru "Safet Zajko" uskoro prva atletska teretana u BiH

Načelnik Općine Novi Grad Sarajevo Semir Efendić potpisao je 20. februara, sa direktorom Njemačke razvojne konsultantske kompanije GOPA mbH Rankom Markušem i Elmirom Ćerimagićem, predsjednikom Atletskog kluba Novi Grad Sarajevo ugovor o dodjeli finansijskih sredstava za adaptaciju devastiranog objekta u Centru „Safet Zajko“ koji će se koristiti za potrebe atletske teretane.

Stavljanjem u funkciju još jednog objekta sportisti će dobiti mogućnost da rade sprinterske, bacačke i skakačke discipline i tokom zimskog perioda, kada zbog snijega nisu u mogućnosti koristiti atletsku stazu. Sredstva u iznosu od 39.000 KM Atletskom klubu „Novi Grad“ dodijeljena su kroz projekat zapošljavanja mladih YEP koji Služba za privredu i lokalni ekonomski razvoj Općine Novi Grad Sarajevo realizira u saradnji sa Organizacijom GOPA i u saradnji sa Švicarskom vladom, a za koji je raspisan konkurs u prošloj godini. Time je otvorena mogućnost da različite organizacije i firme predaju svoje projekte vezane za podršku u zapošljavanju mladih, a jedan od projekata koji je odobren je i projekat Atletskog kluba „Novi Grad“ koji podrazumijeva razvoj atletike.

„Obzirom da u Centru „Safet Zajko“ postoji atletska staza koja je u zimskom periodu nedostupna sportistima, u jednom od devastiranih objekata u Centru počela je sa radom atletska teretana koja je funkcionisala u improviziranim uslovima, tako da će nakon adaptacije još jednog devastiranog objekta ona dobiti puno bolje uslove za rad“, kazao je općinski načelnik Semir Efendić.

Dodao je da će projekat biti podržan i od Općine, te da će i Atletski klub "Novi Grad" samostalno osigurati dio sredstava kako bi se uslovi za atletiku u Novom Gradu popravili i bili što bolji, što bi trebalo rezultirati i što boljim sportskim rezultatima u godinama koje su pred nama.

Kako je kazao Ranko Markuš projekat zapošljavanja mladih YEP već duže vrijeme saraduje sa Općinom Novi Grad kroz nekoliko projekata među kojima je Inkubator poslovnih ideja. „Jadan od poslovnih poduhvata je i ovaj koji pokazuje viziju same Općine u kom smjeru da se razvija. Ono što nam je posebno važno je da će u narednih deset godina po 20-tero djece bez roditeljskog staranja imati priliku da potpuno besplatno koriste usluge ovog Centra. Također, u samom projektu će biti zaposlena i jedna osoba sa evidencije Službe za zapošljavanje KS-a“, objasnio je Markuš.



Prostor za trening i u zimskim mjesecima

Emir Ćerimagić kazao je da se radi o prvoj atleskoj sali u BiH koja omogućava da rade sprinterske discipline, bacačke i skakačke discipline. „Sa nama trenira naš olimpijac Kemal Mešić koji je bio na Floridi četiri godine i veoma je zadovoljan uslovima. U ovoj sali imamo mogućnost da napravimo jamu za skok udalj i samim tim ćemo omogućiti našim atletičarima da napravimo iskorak u profesionalnom sportu, pogotovo da napravimo kontinuitet između ljetnog i zimskog perioda, što je do sada bilo otežavajuće. Ovo je jedna velika prilika za bh. atletiku i za nas atletske radnike podstrek da radimo još bolje“, naglasio je Ćerimagić.

Sportska dvorana „Ramiz Salčin“ na Mojmilu u novom ruhu



Dan košarke u renoviranoj dvorani

Povodom završetka renoviranja sportske dvorane "Ramiz Salčin" na Mojmilu, 23. februara, održan je dan košarke. Cjelodnevni program organizirao je Košarkaški klub Realway Sarajevo, a odigrane su utakmice Omladinske košarkaške lige Kantona Sarajevo, zatim utakmice Perfetta kids lige, najmasovnijeg dječijeg takmičenja u Sarajevu, te meč A2 lige BiH (Realway - KK Jablanica 84:52).

Prije početka utakmice prisutne je pozdravio predsjednik Košarkaškog saveza Bosne i Hercegovine, te bivši kapiten Reprezentacije, Mirza Teletović.

"Drago mi je vidjeti da se ulaže u sportske dvorane i da se radi na poboljšanju uslova za treniranje za sve one koji se bave nekim sportom. Kvalitetna infrastruktura je važna da bi imali vrhunski sport i sportiste. Košarkaški savez BiH je u potrazi za talentima i potencijalnim reprezentativcima, a neki od njih upravo su potekli iz košarkaškog kluba Realway koji je organizirao druženje, te stoga mislim da ih treba biti što više", naglasio je Teletović.

Nakon što je u prošloj godini obnovljen krov sportske dvorane "Ramiz Salčin" na Mojmilu, nedavno je završeno i unutrašnje uređenje ovog sportskog objekta, čime su stvoreni bolji uslovi za treninge i održavanje različitih sportsko - rekreativnih manifestacija. Urađeni su svi molerajski radovi, te brušenje i lakiranje parketa, farbanje tribina, kao i iscrtavanje sportske plohe, nakon čega će se raditi sanacija dijela istočne fasade. Investicija je vrijedna oko 130.000 KM. U narednoj fazi je planirano da se uradi rekonstrukcija svlačionica i mokrih čvorova, tako da će cijeli objekat biti potpuno obnovljen.

Sportska dvorana na Mojmilu izgrađena je za potrebe 14. Zimskih olimpijskih igara 1984. godine, za pripreme sportista, a tokom agresije na BiH zapaljena je i potpuno uništena. Obnovljena je 12 godina nakon rata, 2007. godine, a investicija je koštala oko 4 miliona konvertibilnih maraka.

Ova multifunkcionalna sportska dvorana danas je omiljeno mjesto brojnih sportskih klubova, te mjesto koje svojim posjetiteljima nudi brojne sportsko - rekreativne sadržaje. Objekat je tokom cijele godine u upotrebi u punom kapacitetu, od 1. januara do 31. decembra ovdje se dešavaju različite sportske aktivnosti, a to zahtijeva i određena ulaganja.

Dvorana "Ramiz Salčin" jedna je od rijetkih dvorana sa podnim grijanjem, te je zbog toga posebno koriste sportski klubovi za invalide 3K klub košarke u kolicima i klub sjedeće odbojke "Spid", koji imaju besplatno korištenje dvorane.

Tokom obilaska radova istaknuto je da je upravo preduzeće "Lokom" dobar primjer efikasnog upravljanja sportskim objektima u općini Novi Grad, te su svi objekti u dobrom stanju, a redovno se vrši tekuće i investiciono održavanje, što pokazuje i primjer obnove ove dvorane.

Dvorana na Mojmilu nosi ime Ramiza Salčina, heroja odbrane Sarajeva, ratnog komandanta Teritorijalne odbrane Novi Grad Sarajevo, koji je poginuo 22. augusta 1992. godine.



Prvi međunarodni golbal turnir

U Centru za slijepu i slabovidnu djecu i omladinu u Sarajevu održan je prvi međunarodni golbal turnir. Riječ je o zahtjevnom paraolimpijskom sportu sa loptom za slijepce i slabovidne osobe. Prvo mjesto osvojila je ekipa Crne Gore, dok je ekipa Bosne i Hercegovine zauzela drugo mjesto, dok je treće mjesto pripalo ekipi iz Grčke.

Organizator turnira je bio sportski klub za slijepce i slabovidne „Centar“ iz Sarajeva.

„Golbal je jedan od najpopularnijih paraolimpijskih sportova koji se igra u 120 zemalja svijeta. Kroz organizaciju ovog turnira želimo našem društvu da približimo ovaj sport ali i populaciju slijepih i slabovidnih osoba“, rekao je sekretar udruženja Vehid Hajduković. Otvaranju je prisustvovao direktor škole koji je ustupio prostor za oragnizovanje turnira Damir Ovčina, te načelnik Općine Novi Grad Sarajevo Semir Efendić koji je prisutnim ekipama iz pet država poželio dobrodošlicu, te uručio simbolične poklone.

Na turniru su učestvovali ekipe iz Grčke, Bugarske, Makedonije, Crne Gore i Bosne i Hercegovine.



Internacionalni turnir u fudbalu „Šampion Junor Kup 2019.“

U periodu od 11. do 13. januara u sportskoj dvorani „Ramiz Salčin“ na Mojmilu i sportskoj dvorani „Srce“ u Buća Potoku održan je Internacionalni turnir u fudbalu pod nazivom „Šampion Junor Kup 2019.“

Učestvovalo je više od 160 ekipa iz Bosne i Hercegovine, Hrvatske, Slovenije, Srbije, Makedonije, Crne Gore. Na turniru je učestvovalo više od 1.700 dječaka uzrasta od 2005. do 2011. godišta. U sportskim dvoranama „Ramiz Salčin“ i „Srce“ odigrane su utakmice između ekipa čiji su igrači 2006. i 2009. godišta. Turnir je održan u organizaciji Nogometnog kluba „Šampion Junior“. U trodnevnom takmičenju učestvovalo je 70 ekipa, a odigrane su 142 utakmice.

Malonogometni turnir u znak sjećanja na šehide i poginule borce

U subotu i nedjelju 22. i 23. decembra 2018. godine, u sportskoj dvorani „Ramiz Salčin“ na Mojmilu održan je memorijalni turnir u malom nogometu „Šehidima i poginulim borcima Novog Grada 2018“.

Učestvovali su ekipe iz novogradskih osnovnih škola do sedmog razreda, među kojima je prvo mjesto pripalo ekipi OŠ „Behaudin Selmanović“, drugo mjesto pripalo je ekipi Osnovne škole „Skender Kulenović“, dok je treće mjesto osvojila ekipa OŠ „Čamil Sijarić“.

Najstrijelcem i najgolmanom proglašeni su Bećir Gušić i Emman Čavčić, učenici OŠ „Behaudin Selmanović“, dok je za najigrača proglašen Ahmet Goletić, učenik škole „Čamil Sijarić“.



AK „Novi Grad Sarajevo“ organizirao „Unusual Marathon“

Atletski klub „Novi Grad Sarajevo“ organizirao je 20. januara prvi „Unusual Marathon“, neobičnu utrku koja se u glavnom gradu BiH odvijala po uzoru na ekstremne ultra maratone, trijatlone i druge challenge. Na ruti dugoj od 42 kilometra trčalo je 180 takmičara iz cijele BiH.

Kroz cilj je kao pobjednik istrčao Matthew Simonson. Za njim su, na drugom i trećem mjestu, kroz cilj u Centru „Safet Zajko“ utrčali i Emir Hastor i Samir Mehmedagić.

Trkači su tačno u 10 sati potrčali iz Centra „Safet Zajko“, gdje je bio start, a trčalo se ulicama grada, od Darive do Vrela Bosne, preko Miljacke i Željeznice s ciljem u Centru „Safet Zajko“.

Elmir Čerimagić, predsjednik AK „Novi Grad Sarajevo“ kazao je da se prvi put trči u januaru, po zimi, što ovaj maraton u BiH čini specifičnim. „Specifično je i što ne zaustavljamo saobraćaj. U saradnji sa MUP-om KS-a regulisane su raskrsnice i olakašan je prolaz trkačima. Trkači nemaju sudija, već koristimo savremene uređaje s GPS sistemom“, kazao je Čerimagić.

„Ovo je prvi sarajevski puni maraton. Danas ulazimo u historiju, samim time što trčimo i po snijegu“, rekao je Miran Stambol, jedan od takmičara.

Mirzet Halilović iz Tuzle, koji je ranije istrčao 13. najbolje vrijeme u BiH, kazao je da su uslovi u Sarajevu idealni za trčanje.

Na odbojkaškom turniru u OŠ "Mustafa Busuladžić", pobjedila ekipa OŠ "Skender Kulenović"



Povodom obilježavanja Dana Općine Novi Grad Sarajevo u novoootvorenoj sportskoj dvorani Osnovne škole "Mustafa Busuladžić" u Dobroševićima održan je dvodnevni turnir u odbojci za 2018. godinu u okviru ženske odbojkaške lige novogradskih škola. Na prvom općinskom odbojkaškom takmičenju nastupile su učenice iz 15 novogradskih škola, a nakon uzbudljivih i neizvjesnih utakmica za finale su se izborile četiri

školske odbojkaške ekipe. Prvo mjesto pripalo je odbojkaškoj ekipi OŠ "Skender Kulenović", drugo mjesto osvojila je ekipa OŠ "Osman Nakaš", a treće OŠ "Mehmedalija Mak Dizdar". Turnir u odbojci otvorio je načelnik Općine Novi Grad Sarajevo Semir Efendić. Istakao je da će Općina i ubuduće podržavati ovakve i slične sportske aktivnosti za djecu i omladinu. Svečanom

otvaranju, praćenim prigodnim kulturno-umjetničkim programom, prisustvovao je veliki broj učenika, njihovih roditelja, nastavnika i predstavnika drugih obrazovnih ustanova i gostiju, među kojima i Fahri Solak, generalni sekretar Unije općina turskog svijeta (TDBB), koji je predvodio delegaciju iz Azerbejdžana tokom boravka u trodnevnoj posjeti Općini Novi Grad Sarajevo i Bosni i Hercegovini.

U sportskoj dvorani OŠ „Aneks“ održan turnir u košarci za dječake



U novoizgrađenoj sportskoj dvorani Osnovne škole „Aneks“ 26. i 27. decembra 2018. godine održana je mini košarkaška liga za učenike s područja općine Novi Grad u okviru koje su se takmičili učenici iz 15 novogradskih osnovnih škola.

Bila je to završna općinska mini liga koja je realizirana u povodu obilježavanja 41. godišnjice od osnivanja Općine Novi Grad Sarajevo, čijem otvaranju su prisustvovali predstavnici Općine Novi Grad Sarajevo, direktori i nastavno osoblje novogradskih škola, učenici i drugi gosti.

Prisutnima je dobrodošlicu poželio direktor škole Omer Begović, a turnir je otvorio pomoćnik načelnika Općine Novi Grad Sarajevo za obrazovanje, kulturu i sport Hamdija Dizdar koji je izrazio zadovoljstvo realizacijom projekta koji okuplja djecu iz svih škola.

U okviru lige učestvovalo je 15 osnovnih škola s područja općine Novi Grad i ovaj turnir je upriličen kao završni turnir u okviru obilježavanja 41. godišnjice naše Općine.

Turniri su održani u novootvorenim sportskim dvoranama. Projekat se nastavlja i u narednoj godini, a realizirat će se u sklopu manifestacije „Novogradski dani 2019“.

Događaj je upotpunjen nastupom učenika drugog razreda osnovnih škola uz muzičku numeru „Hajmo Bosno, hajmo Hercegovino“. Takmičenje je okupilo oko 250 učenika.

Prvo mjesto pripalo je košarkaškoj ekipi OŠ „Osman Nakaš“, drugo mjesto OŠ „Fatima Gunić“ i treće OŠ „Mehmedalija Mak Dizdar“.

OTKRIVENO SPOMEN - OBILJEŽJE UBIJENOJ DJECI MZ „ALIPAŠIN MOST - 1“

Na mermernim pločama ispisano 25 imena



Pored sportskog igrališta u naselju Vitkovac, 17. septembra 2018. godine, otkriveno je spomen - obilježje izgrađeno u znak sjećanja na djecu ovog naselja ubijenu tokom agresije na našu zemlju.

Spomenik je svojevrsni podsjetnik na nevine žrtve koje su ubijene u periodu od 1992. do 1995. godine i ono što se u ovom dijelu Novog Grada tada dešavalo. Na mermernim pločama ispisana su imena 25 ubijene djece s ovog područja, a sam plato je hortikulturno uređen i opremljen klupama za sjedenje, kako bi oni koji se žele prisjetiti ubijenih i odati im počast mogli sjesti i predahnuti.

Zajedno sa načelnikom Semirom Efendićem spomen – obilježje otkrili su roditelji ubijene djece, uz prisustvo mnogobrojnih građana, roditelja, učenika i nastavnika osnovnih škola, predstavnika boračkih udruženja, izvršne i zakonodavne vlasti.

„Izgradili smo spomenik ubijenoj djeci, da se pamti i ne zaboravi šta nam se dešavalo u periodu od 1992. do 1995. godine. Pored spomenika svakodnevno prođe veliki broj djece i buduće generacije trebaju da znaju da su njihovi prethodnici ubijani tokom igre i da oni cijene to što danas imaju sretnije djetinjstvo“, kazao je Tajib Delalić, pomoćnik načelnika Općine Novi Grad Sarajevo za boračka pitanja, rad, socijalna pitanja i zdravlje.



Admir Holjan ubijen sa nepunih 13 godina

Među prisutnima bio je i Ramiz Holjan, otac rahmetli Admira, koji je ubijen sa nepunih 13 godina. Ističe da se u životu može sve zaboraviti, ali ne i gubitak djeteta. „To nijedan roditelj ne može. Moj Admir je ubijen 16. decembra 1992. godine u 13. godini. Sa njim su ubijena još dvojica dječaka, a dvoje djece je ranjeno i ostali su trajni invalidi. Ovdje u MZ „Alipašin Most -1“ je za vrijeme opsade Sarajeva i agresije na BiH ubijeno 25 djece. Uz pomoć Općine Novi Grad na ovom mjestu izgrađeno je igralište, a pored njega spomen ploča ubijenoj djeci. Djeca koja su ubijena u ovom naselju bila su školskog uzrasta. Danas bi bio radostan da je njihovo vjenčanje, ali nažalost nije. Zato smo pozvali djecu, da čuju i da znaju šta se dešavalo tokom rata u BiH, kako bi oni znali graditi bolju i jaču državu, državu koja je najljepša na svijetu“, izjavio je Holjan.

Počast nevino ubijenoj djeci

Na spomen - obilježju poleženo je cvijeće i odata počast nevino ubijenoj djeci s ovog područja, nakon čega su učenici osnovnih škola „Umihana Čuvidin“, „Fatima Gunić“, „Behaudin Selmanović“ i „Sokolje“ izveli prigodan program, a potom je u organizaciji fudbalskog kluba „Biser“ odigrana i revijalna utakmica.



Položeno cvijeće na spomenik žrtvama genocida u Parku prijateljstva na Dobrinji

Predstavnici Općine Novi Grad zajedno sa članovima delegacije iz Azerbejdžana i Republike Turske koji su boravili u trodnevnoj posjeti ovoj lokalnoj zajednici i BiH, 12. decembra 2018. godine posjetili su Park prijateljstva na Dobrinji, gdje su odali počast žrtvama genocida u BiH i žrtvama masakra počinjenog nad civilima u azerbejdžanskoj pokrajini Hodžali.

U delegaciji su bili načelnici pet općina iz Bakua, glavnog grada Azerbejdžana, gdje je delegacija Općine Novi Grad Sarajevo, početkom augusta prošle godine, bila u posjeti. Predvodio ju je Fahri Solak, generalni sekretar Unije općina turskog svijeta (TDBB) i Tamraz Tađiyev, predsjednik Unije gradskih općina Azerbejdžana. Prijateljstvo naroda Azerbejdžana i BiH datira još od bratimljenja grada Sarajeva i Bakua prije 40 godina.

To prijateljstvo se dalje gradilo tokom 1992. godine, kada smo prošli sličnu patnju, pokolj civila u Hodžaliju i agresiju na našu zemlju. To vrijeme simbolizira i spomenik u Parku prijateljstva kojeg čine dvije majke od kojih je jedna iz BiH, a druga iz Azerbejdžana. Izgradnju Parka i spomenika finansirao je Fond „Heydar Aliyev“ iz Republike Azerbejdžan, a otvorila ga je Lejla Aliyev, kćerka predsjednika Republike Azerbejdžan 2012. godine.

Zakir Yafarov, načelnik Općine Yasamal istakao je da su u BiH i općinu Novi Grad Sarajevo došli kao gosti ispred Unije općina turskog svijeta. „Ova posjeta je bila jako korisna za nas i žao nam je što je bosanski narod prošao kroz istu tragediju kao i azerbejdžanski narod. Razgovarali smo o pobratimskoj saradnji između dvije općine i nadam se da će to biti nastavak saradnje dvije zemlje“, izjavio je Yafarov.

Članovi delegacije također su obišli Centar za slijepu i slabovidnu djecu i omladinu u Nedžarićima i sportsku salu Centra čiju je rekonstrukciju i dogradnju također finansirala Fondacija „Heydar Aliyev“ iz Republike Azerbejdžan. Obilasku su prisustvovali i članovi Komisije za saradnju sa lokalnim zajednicama u BiH i inostranstvu Općinskog vijeća Općine Novi Grad Sarajevo.



Hair - česma borcima 2. Viteške motorizovane brigade



U povodu obilježavanja 26. godišnjice 2. Viteške motorizovane brigade i 10. godišnjice od osnivanja Udruženja „Druga viteška“ Novi Grad Sarajevo, u parku Sportsko - rekreacionog centra „Srce“ u Buća Potoku, puštena je u funkciju hair - česma, koju je Općina Novi Grad Sarajevo izgradila u čast boraca Druge viteške brigade. „Danas obilježavamo godišnjicu Druge viteške i tim povodom okupili smo se pored hair - česme koju je Općina Novi Grad posvetila svim pripadnicima te brigade, poginulim, ali i preživjelim borcima, svima koji su na ovom području ratovali. Ovo je zona odgovornosti 2. Viteške motorizovane, a navršila se 26. godišnjica od formiranja te brigade. Ovim povodom smo organizirali niz aktivnosti u znak sjećanja i zahvalnosti šehidima, poginulim i preživjelim borcima koji su branili državu Bosnu i Hercegovinu, grad Sarajevo i općinu Novi Grad“, kazao je Tajib Delalić, pomoćnik općinskog načelnika za boračka pitanja, rad, socijalna pitanja i zdravstvo.

Hair - česma izgrađena je u središtu parka kojeg svakodnevno posjećuje veliki broj građana sa djecom. Česma će služiti svim posjetiocima ovog parka, gdje će se moći osvježiti vodom sa česme i pročitati posvetu koja ima svoju poruku.

Povodom obilježavanja godišnjice 2. Viteške motorizovane brigade delegacije su položile cvijeće na Centralno spomen – obilježje kod zgrade Općine Novi Grad, nakon čega je u multimedijalnoj sali Općine održana akademija i promocija monografije 2. Viteške motorizovane brigade.



Akademija i večer poezije posvećeni heroju odbrambeno-oslobodilačkog rata Smailu Smaji Šikalu



Povodom obilježavanja 26. godišnjice bitke za oslobađanje kote Vis na brdu Žuč i pogibije „Zlatnog Ljiljana“ i dobitnika „Medalje za hrabrost“ Smaila Smaje Šikala, te pomoćnika za bezbjednost Feriza Tumbula i komandira čete Nusreta Brkića i Senada Čolića, 10. decembra 2018. godine u multimedijalnom centru Općine Novi Grad Sarajevo, uz prigodan program održani su akademija i večer poezije posvećeni heroju odbrambeno - oslobodilačkog rata i pjesniku Smailu Smaji Šikalu.

Akademiji su prisustvovali brojni zvaničnici, među kojima Sead Jusić, zamjenik ministra odbrane za politiku i planove BiH, te preživjeli borci, članovi porodica šehida i poginulih boraca i drugi brojni gosti.

Prisutnima su se obratili općinski načelnik Semir Efendić, zatim Sead Čardaklija, predsjednik Upravnog odbora Udruženja „2. Viteška brigada Novi Grad“, a o liku i djelu Smaje Šikala govorio je Safet Kešo, pomoćnik komandanta za moral u 2. Viteškoj motorizovanoj brigadi.

Prigodnim riječima prisutnima se također obratio i poznati bosanskohercegovački pjesnik, prozaik akademik Abdulah Sidran, te bh. glumac Izudin Bajrović, koji je recitirao stihove jedne od Samajinih pjesama iz zbirke „Moja pučina“, kao i učenici Osnovne škole „Umihana Čuvidina“. Program je upotpunjen izvedbom patriotskih pjesama ratnog orkestra 2. Viteške motorizovane brigade.

Rahmetli Šikalo bio je komandir vojne policije 2. motorizovane brigade Armije RBiH i jedan od prvih dobrovoljaca koji su se prijavili da brane Sarajevo tokom agresije. Prvi put je ranjen u borbama kod Elektroprivrede, a posljednji put na Sokolju dok je pomagao ranjenom saborcu. Sedam dana poslije podlegao je povredama. Načelnik Semir Efendić istakao je da Općina zajedno sa boračkim

udruženjima „vodi bitku protiv zaborava“. „Kroz brojne projekte koje realiziramo, počev od izgradnje spomen-obilježja u svim dijelovima općine, izgradnje Doma oslobodilaca, snimanja dokumentarnih filmova i izdavanja monografija, na neki način smo postigli dosta u tome“, istakao je načelnik Efendić.

Također je kazao da je Novi Grad bio bedem u ratu, a to je i danas u borbi protiv zaborava, ali i u svim drugim bitkama i na svim poljima sa čime se naša država i narod suočavaju.

Gazija Smail Šikalo i svi ostali koji su dali živote za svoju domovinu Bosnu i Hercegovinu nas obavezuju da ih nikada ne zaboravimo.



Sjećanje na učiteljicu Fatimu Gunić i njene učenike



Navršila se još jedna tužna godišnjica otkako su na svirep način, zločinačkom granatom ispaljenom sa agresorskih položaja iz pravca Nedžarića ubijeni heroina, učiteljica Fatima Gunić i njeni učenici Vedad Mujkanović, Adis Mujalo i Feđa Salkić.

Škola na Alipašinom Polju, koja nosi učiteljicino ime, 25 godina čuva uspomenu i sjećanje na učiteljicu i učenike koji su ubijeni zločinačkom minobacačkom granatom 9. novembra 1993. godine u improviziranoj učionici gdje se održavao čas bosanskog jezika. Tog kobnog dana teže i lakše su ranjena još 23 učenika.

Povodom tog tužnog događaja organizovan je niz aktivnosti kako bi se dostojanstveno obilježili Dani sjećanja i godišnjica jednog od najtužnijih dana protekloga rata, a centralna manifestacija „Skriveni od zaborava“ održana je na Trgu ZAVNOBiH-a, gdje je položeno cvijeće i odata počast učiteljici i njenim učenicima.

Među brojnim zvaničnicima, građanima i učenicima Danu sjećanja na učiteljicu i njene učenike prisustvovali su roditelji, rodbina i prijatelji ubijene djece i njihove učiteljice.

Roditeljska bol iz godine u godinu sve je veća, detonacija granate koja je ispaljena na improvizovani punkt škole zauvijek će odjekivati u njihovoj glavi. Teško je pričati o tome danu, uzdasi i suze govore sve, kaže Ramiz Holjan, potpredsjednik Udruženja ubijene djece opkoljenog Sarajeva 1992-1995.

„Heroina, učiteljica Fatima Gunić je tokom rata neustrašivo odlazila od punkta do punkta kako bi djecu zabavila, naučila, udaljila bar na čas njihove misli od ratnih strahota. Tako je bilo i tog tužnog dana prije 25 godina. Dok su govorili o ljubavi, sreći, jedinstvu, zločinac je ispalio granatu i ubio našu heroinu Fatimu Gunić i njena tri učenika. Nažalost, zločini su se dešavali u cijelom gradu i BiH. Svi roditelji koji su doživjeli gubitak djeteta nose istu bol i ranu. Ta rana se ne može ni liječiti niti zaliječiti, ali najteže je što se rane povređuju neistinama. Ne želimo osvetu, mi želimo samo istinu i pravdu. Krajnje je vrijeme da pravosudne institucije počnu raditi i da zločinci, ma kako se oni zvali, odgovaraju za počinjena djela“, kazao je Holjan.

Tokom obilježavanja Dana sjećanja na Fatimu Gunić i njene učenike, oko 300 učenika posjetilo je spomen-sobu u OŠ „Fatima Gunić“.





U ulici *Žrtava fašizma 1993. godine granata usmrtila devet sugrađana*



Položeno je cvijeće na mjesto masakra u ulici *Žrtava fašizma* u naselju Otoka, u znak sjećanja na ubijene sugrađane.

Na to mjesto, prije 25 godina, sa agresorskih položaja iz Nedžarića ispaljene su tri granate od čijeg je eksplozivnog dejstva smrtno stradalo devet, a teže i lakše ranjeno 38 Sarajlija.

Samo dan ranije, sa istih položaja neprijateljske vojske ispaljeni su projektili koji su ubili učiteljicu Fatimu Gunić i troje njenih učenika tokom održavanja nastave na Alipašinom Polju, Ali, kobni 09. i 10. novembar 1993. godine nisu bili iznimka, jer su agresori tokom cijelog perioda opsade Sarajeva sistematski ubijali djecu i civile Sarajeva.

Na ovom mjestu okupili su se članovi porodica ubijenih, rodbina, komšije i prijatelji, zvaničnici sa lokalnog, kantonalnog i gradskog nivoa, te predstavnici boračkih udruženja, Savjeta mjesne zajednice, kao i učenici obližnje škole "Mehemedalija Mak Dizdar" koji su se prisjetili nedužno ubijenih građana, a kako su kazali, to će činiti i narednih godina i opominjati buduće generacije na zlo koje se ne smije nikome više nikada dogoditi.

Među prisutnima je bila Sunita Shaw, djevojka koja je kao šestogodišnja djevojčica ranjena na ovom mjestu, a koja danas živi u Australiji. "Došla sam iz daleke Australije kako bi prisustvovala obilježavanju godišnjice strašnog zločina počinjenog na ovom mjestu, a u kojem sam i sama teško ranjena", rekla je Sunita.

U masakru u ulici *Žrtava fašizma* živote su izgubili: Elma Geko, Slavojka Govedarica, Semir Haseta, Amina Hećo, Ajdin Hodžić, Ibrahim Huskić, Vinko Lončar, Silvijo Mačorović i Božidar Šuka.



Sjećanje na policijskog službenika Muhidina Pivodića

Predstavnici Općine Novi Grad zajedno sa predstavnicima Ministarstva unutrašnjih poslova Kantona Sarajevo, Sindikata policije MUP-a Kantona Sarajevo, vjerskih zajednica, kolegama, članovima porodice i prijateljima, okupili su se 31. decembra 2018. godine na mjestu pogibije policijskog službenika Muhidina Pivodića ispred pravoslavne crkve u novogradskom naselju Reljevo i odali mu počast.

Pivodić je ubijen 31. decembra 2012. godine dok je osiguravao Hram svetog Nikolaja u Reljevu. Na skupu je rečeno kako je ovo izuzetno tužan dan, te da pogibija Pivodića ostavlja trag na kolege, ali i na kompletan sistem, te da je današnji dan prilika da se kolege i prijatelji sjete ubijenog kolege i da na ovaj način nastoje čuvati i njegovati uspomenu na njega. Cvijeće na spomen-ploču, na mjestu pogibije u Reljevu položili su i članovi porodice Pivodić, majka, supruga i sin.

Policajska istraga pokazala je da je počilac tog krivičnog djela Anel Čemo, kojeg je Kantonalni sud u Sarajevu u maju 2014. godine, osudio na jedinstvenu kaznu zatvora od 34 godine.

Godišnjica masakra u Potur Šahidijinoj ulici



Uz prisustvo predstavnika Općine Novi Grad Sarajevo, Udruženja roditelja ubijene djece opkoljenog Sarajeva 1992-1995., boračkih udruženja, članova porodica ubijenih, učenika Osnovne škole "Umihana Čuvidina" i brojnih građana 16. decembra 2018. godine obilježeno je godišnjica stradanja trojice dječaka koji su igrajući se ispred kuće u ulici Potur Šahidijina na broju 1 poginuli od granate ispaljene sa agresorskih položaja.

Učenjem Fatihe, minutom šutnje i polaganjem cvijeća na spomen - ploču u Boljakovom Potoku, obilježena je još jedna tužna godišnjica stradanja Admira Holjana (1979.), Aldina Alihodžića (1979.) i Denisa Bašovića (1982.), učenika OŠ "Umihana Čuvidina". Ubijeni su prije 26 godina, tačnije 16. decembra, 1992. godine minobacačkom granatom ispaljenom s agresorskih položaja, a braća Nijaz i Nihad Poturak teško su ranjeni i ostali su trajni invalidi.

Ramizu Holjanu u ovom zločinu ubijen je sin Admir. Kaže da svoj gubitak nikada neće preboljeti. "Okupili smo se na mjestu ovog strašnog zločina, da se sjetimo naših sinova i nevinih žrtava da bismo ih sačuvali od zaborava. Ono što nosimo u našim srcima je rana golema. Agresor je ciljano ubijao našu djecu. 26 je godina prošlo od tada, danas bi oni imali svoje porodice, supruge i djecu", kaže Ramiz.

Dodaje da današnji dan nikada zaboraviti neće, svaki put kada prođe pored ovog mjesta ne osjeća svoje noge. Njegov Admir ubijen je u cvijetu rane mladosti, u svojoj 13. godini. „Dan je bio sunčan, miran kao da nije bio rat. On i njegovi drugovi su se dogovorili da se idu igrati u drugi dio naselja, samo što su krenuli i došli do garaže na kojoj je danas postavljena spomen - ploča, granata je eksplodirala u njihovoj blizini usljed čijeg dejstva su Admir, Aldin i Denis poginuli, a braća Nijaz i Nihad Poturak koji su bili s njima teško su ranjeni", prisjeća se Ramiz dana kojeg će do smrti pamtili.

Ističe da je to što porodice ubijene djece nose u srcima rana neizlječiva, ali ono što ih dodatno boli je to što ih vrijeđaju, što negiraju genocid, što negiraju to da su počinili agresiju na BiH, ali Ramiz poručuje da će porodice ubijenih istrajati u svojoj borbi za pravdu da se zločinci privedu pred lice pravde i da dobiju kaznu koju su zaslužili.

Obilježavanju je prisustvovao općinski načelnik Semir Efendić. Kazao je da je obaveza sviju nas da obilježavamo ovakve događaje i da se sjećamo djece koja su nevinno stradala, da se prisjetimo svih onih koji su dali živote za odbranu domovine od agresora, ali da ne zaboravimo ko nam je sve to radio i ko je ubijao nevinu djecu u Sarajevu. „Ovo je prilika da pozovemo

nadležne, naročito pravosudne institucije da se pozabave istragama ko je ubijao djecu po Sarajevu, kako ovakvi zločini ne bi prošli nekažnjeno", izjavio je načelnik Efendić.

Cvijeće na mjesto masakra položile su i delegacije Grada Sarajeva i Savjeta Mjesne zajednice „Alipašin Most-1", a nakon polaganja cvijeća proučen je Ja'sin i dova za ubijene dječake.

Teško ranjeni braća Nijaz i Nihad Poturak

Među prisutnima je bio Nijaz Poturak koji je kao 15-godišnjak teško ranjen u masakru, 16. decembra 1992. godine u Potur Šahidijinoj ulici. Danas je on 90 postotni invalid. S velikim bolom prisjetio se toga dana:

„Izašao sam sa drugovima i bratom da se igramo, iznenada je pala granata koja je na mjestu ubila trojicu mojih komšija i velikih prijatelja, nikada ih neću zaboraviti. Brat i ja smo tada teško ranjeni, ali smo nekom srećom i Božijom voljom preživjeli. Prijatelji moji su stradali, kao da se jučer desilo i danas se sjećam svega i nikada to neću zaboraviti. Taj događaj ostavio je trajne posljedice u mom životu", ispričao je Nijaz.

Tužno sjećanje na Sarajlije ubijene na pijaci Markale

Položeno je cvijeće, na mjesto masakra na sarajevskoj pijaci Markale, gdje je prije 25 godina granatom ispaljenom sa agresorskih položaja ubijeno 68 Sarajlija, a teže i lakše ranjeno 142 građanina.

Članovi porodica žrtava, preživjeli, brojne delegacije i građani Sarajeva odali su počast najmilijim i sugrađanima koji su tog subotnjeg podneva, 5. februara 1994. godine, izgubili živote na Markalama. Prvi od dva masakra na pijaci Markale, u samom centru Sarajeva, dogodio se na današnji dan između 12 i 12.10 sati, kada je minobacački projektil kalibra 120 milimetara ispaljen sa položaja vojske Republike Srpske s područja sela Mrkovići, pa o na prepunu gradsku pijacu.

Najprometnija sarajevska pijaca Markale i tokom rata u Bosni i Hercegovini od 1992. do 1995. godine bila je jedno od mjesta za snabdijevanje stanovnika opkoljenog grada. Na tom mjestu se obavljala trgovina prehrambenim proizvodima i svim onim što je na bilo koji način moglo poslužiti građanima Sarajeva da prežive teške ratne dane.

U povodu Dana sjećanja na sve stradale građane Sarajeva u periodu opsade Sarajeva od 1992-1995. godine i godišnjice masakra na pijaci Markale u Narodnom pozorištu održana je zajednička komemorativna sjednica Skupštine Kantona Sarajevo, Gradskog vijeća i općinskih vijeća KS-a.



Godišnjica masakra u Bosanskoj ulici na Alipašinom Polju

U ulici Bosanska kod broja 4, u C-fazi naselja Alipašino Polje, 22. januara, obilježena je tužna godišnjica ubistva šestoro djece.

Tim povodom delegacija Općine Novi Grad, Kantona Sarajevo, Gradskog vijeća i predstavnici Udruženja roditelja ubijene djece opkoljenog Sarajeva 1992-1995, te rodbina i prijatelji ubijenih položili su cvijeće na mjesto masakra.

Na tom mjestu je, 22. januara 1994. godine, od eksplozivnog dejstva tri minobacačke granate ispaljene sa agresorskih položaja, ubijeno šestoro djece, a šestoro ih je ranjeno, dok su se sankali. Dječija radost se tog snježnog dana pretvorila u tragediju. Veseli dječji glasovi u sekundi su utihnuli. Opsada Sarajeva tada je već trajala skoro tri godine i djeca su htjela malo uživati u zimskim radostima. Sankali su se i igrali. A onda su oko 13.40 sati sa položaja agresora iz Nedžarića ispaljene tri granate. Jedno dijete je ubila detonacija dok je bježalo prema haustoru zgrade, a ostala djeca su stradala od gelera. Poginuli su: Indira Brković (rođena 1982.), Jasmina Brković (1989.), Mirza Dedović (1986.), Danijel Jurenić (1983.), Nermin Rizvanović (1981.) i Admir Subašić (1986.).

„Na današnji dan, prije 25 godina, prilikom sankanja ubijeno je šestoro djece, šest nevinih bića. Pomisao na tako strašan prizor je teška, jer šest nevinih bića koja su se samo igrala ubijeno je na tako zvjerski način“, kazao je predsjednik Udruženja roditelja ubijene djece opkoljenog Sarajeva 1992-1995 Fikret Grabovica. „Danas smo obilježili godišnjicu, položili smo cvijeće i na taj način čuvamo sjećanje na nevino ubijenu djecu i čuvamo istinu od zaborava“, kazao je Grabovica.

Naglasio je da je „saznanje da niko za taj zločin nije odgovarao, kao i za mnogobrojne druge, tragično i to saznanje onima koji su izgubili svoje najdraže teško pada i boli“.

Na mjesto masakra cvijeće su položili i predstavnici Mjesne zajednice i političkih partija.



U općini Novi Grad Sarajevo u prošloj godini rođeno 1.635 djece



Prema evidenciji matičnog ureda Općine Novi Grad Sarajevo prirodni priraštaj stanovništva u prošloj godini bio je veći za 435 novorođene djece u odnosu na broj umrlih, što potvrđuje podatak da je u Matičnu knjigu rođenih za 2018. godinu upisano 1.635 novorođenčadi, dok je u Matičnu knjigu umrlih evidentirano 1.200 upisa.

Matičari ove lokalne zajednice sklopili su 654 braka, a na šalterima za izdavanje obrazaca primljeno je 52.730 građana, te izdato 54.633 obrazaca i zahtjeva. Također, primljeno je i protokolisano 38.510 predmeta, a blizu 1.000 građana dobilo je besplatnu pravnu pomoć.

Obzirom na činjenicu da je Novi Grad općina sa najviše stanovnika u BiH, te broj građana koji koriste usluge općinskih službi, i broj postupaka koji se provode u ovoj lokalnoj zajednici je rekordan. Prema podacima nadležne službe, šalter-sala Općine Novi Grad jedan je od najfrekventnijih javnih prostora u Kantonu Sarajevo i Federaciji BiH, u prosjeku je dnevno posjeti oko 2.000 građana. Uposlenici Službe za opću upravu ovjerali su blizu 600.000 dokumenata, od toga je ovjerenjeno 482.579 dokumenata i 84.508 potpisa.

Aida Rizvanović, pomoćnica načelnika Općine Novi Grad za poslove opće uprave ističe da je evidentan napredak u brzini i obradi zahtjeva građana.

„Zahtjevi za izdavanje potvrda i uvjerenja iz oblasti rada Službe za boračka pitanja, rad, socijalna pitanja i zdravstvo, službe za opću upravu i Službe za urbanizam rješavaju se odmah, tako da stranka uopće ne čeka da bi se udovoljilo njenom zahtjevu. Zahtjevi kao što su zahtjev za izdavanje prepisa posjedovnog lista, kopije katastarskog plana i uvjerenja o posjedovanju /neposjedovanju nekretnina također se završavaju odmah, kao i verifikovane kopije katastarskog plana“, pojasnila je Rizvanović.



Potpisano novih 15 ugovora za projekte podrške održivom povratku



Rebalansom budžeta općina Novi Grad Sarajevo za 2018. godinu izdvojeno je dodatnih 40.000 konvertibilnih maraka za podršku održivom povratku na područje manjeg bh. entiteta, a ugovori su potpisani sa još 15 korisnika, pojedinaca, udruženjem, i općinama Kalinovik i Rudo.

“Grant za pomoć povratnicima u prijeratna mjesta prebivališta, Općina Novi Grad Sarajevo realizuje već duži vremenski period. Za pomoć održivom povratku iz općinskog budžeta u prošloj godini izdvojeno je 160.000 KM, a na prijedlog koordinacionog odbora za povratnike rebalansom budžeta izdvojena su i dodatna sredstva. Radi se o projektima elektrifikacije, priključaka vode, izgradnje i uvezivanja putne infrastrukture, kupovinu stoke, motokultivatora i drugih mašina, te nabavku građevinskog materijala”, rekao je Tajib Delalić, pomoćnik načelnika za boračka pitanja, rad, socijalna pitanja i zdravstvo.

Sulejmana Gluhić iz sela Purtići, Općina Rogatica, sredstva koja su joj dodijeljena iskoristit će za kupovinu krave. “Povratnica sam u Žepu, u selo Purtiće od 2000. godine. Živim sa svoja dva sina od poljoprivrede i stočarstva i kupovina krave olakšat će mi život”, rekla je Sulejmana.

Mehmed Ćubara izdvojenim sredstvima finansirat će izgradnju puta. “Dio sredstava za putnu infrastrukturu u prošloj godini izdvojila je TIKA-a, a sredstvima od Općine Novi Grad Sarajevo finansiram izgradnju puta koji povezuje sela Bogdašiće, Džankiće, Bijeli Potok, Brodar i Međeđu.



Predstavljeni rezultati projekta „Grad/Općina po mjeri djeteta“



Povodom Međunarodnog dana prava djeteta u Općini Novi Grad Sarajevo održana je manifestacija na kojoj su predstavljeni postignuti rezultati u realizaciji projekta „Grad/Općina po mjeri djeteta“ koji se provodi u saradnji sa Udruženjem „Naša djeca“ Sarajevo.

Uz prigodan kulturno-zabavni program, ovom prilikom predstavljene su dobre prakse koje ova lokalna zajednica kontinuirano provodi kako bi poboljšala uslove življenja za djecu i omladinu. Koko je ovom prilikom kazala Zehra Salman, predsjednica Udruženja „Naša djeca“ u ovaj projekat Općina Novi Grad je ušla 2008. godine od kada predano radi na izgradnji što boljih uslova za život sve djece u lokalnoj zajednici.

„U proteklom periodu ova Općina je napravila izuzetne rezultate na polju predškolskog obrazovanja, poboljšanju uslova za

boravak djece u vrtićima, većeg obuhvata djece predškolskim odgojem u saradnji sa JU „Djeca Sarajeva“. Kada su u pitanju objekti namijenjeni za osnovno obrazovanje, urađen je veliki broj projekata, ni jedna škola na području Novog Grada nije ostala, a da nešto u njoj nije urađeno po pitanju poboljšanja uslova rada, od dogradnje, izgradnje, utopljanja, popravke krovova, nabavke opreme i učila i svega onoga što prati jedan kvalitetan nastavni proces. Očekujemo da ćemo do 2020. godine imati prvu općinu u BiH koja je postala Općinom po mjeri djeteta“, izjavila je Salman. Također je kazala da ova lokalna zajednica pridaje važnosti i projektima socijalne zaštite, brige o majkama, porodiljama, poboljšanju standarda učenika dodjelom stipendija i nizom drugih projekata kojima nastoji poboljšati kvalitet življenja u ovoj lokalnoj zajednici.

Miss BiH za 2018. godinu stanovnica Općine Novi Grad

Miss Bosne i Hercegovine dvadesetogodišnja Anđela Paleksić posjetila je, 19. oktobra 2018. godine, Općinu Novi Grad Sarajevo, gdje ju je ugostio načelnik Općine Semir Efendić.

Zajedno sa Anđelom u posjeti su bili i producent Izбора za Miss BiH Robert Jovanović i direktorica izbora za Miss BiH Stela Zubak Jovanović, a razgovarano je o putu u Kinu gdje će se održati izbor za „Miss Svijeta“.

Načelnik Efendić istakao je da će Anđela biti ambasadorica svoje Općine i države, kako na dan izbora, tako i cijeli mjesec dana priprema u Kini. „Jedan ovakav izbor dobra je prilika da se prezentira sve ono što naša država ima ponuditi kroz razne promotivne materijale - video zapise, umjetnine, prezentacije kulture i tradicije“, istakao je načelnik Efendić.

Izbora za „Miss Svijeta“ svake godine prati preko 3 milijarde ljudi, što ga svrstava među najgledanije događaje na svijetu.



Olakšana kupovina stanova mladima



Općina Novi Grad Sarajevo i ove će godine sufinansirati stambene kredite za mlade koji još uvijek nisu riješili stambeno pitanje. Radi se o projektu iz Programa „Novi Grad 2020“ koji se provodi kako bi mladim ljudima olakšala rješavanje stambenog pitanja kroz otplatu dijela kamatne stope od 3 posto. Za tu namjenu je iz ovogodišnjeg budžeta osigurano 150.000 KM, a partnerska banka koja je odabrana putem javnog poziva Bosna Bank International (BBI) je osigurala fond koji će pratiti ovaj program u iznosu od 10 miliona KM.

Pomoćnik općinskog načelnika za finansije Emir Dedović i Amer Bukvić, predsjednik Uprave Bosna Bank International (BBI) potpisali su ugovor o subvencioniranju profitne marže za stambena finansiranja za mlade s područja Novog Grada.

Tom prilikom Dedović je kazao da je ova lokalna zajednica prepoznala potrebu pružanja pomoći mladim ljudima u rješavanju jednog od najznačajnijih egzistencijalnih pitanja.

„Već četiri, pet godina Općina u saradnji sa BBI bankom provodi mjere koje se odnose na privredu i zapošljavanje, a drugu godinu radimo projekat koji se odnosi na pomoć mladim ljudima sa područja naše općine da riješe svoje stambeno pitanje. To se prije svega odnosi na osobe i bračne parove do 35 godina starosti, sa mjestom prebivališta u općini Novi Grad zadnje 3 godine. Onima koji dobiju ovu vrstu subvencije Općina će plaćati 3 posto kamatne stope u narednih 5 godina“, izjavio je Dedović.

Ugovorom je predviđeno da jedan aplikant može dobiti finansiranja do 120 hiljada KM. Rok otplate je do 20 godina, a profitna marža kretat će se od 3 do 3,69 posto u zavisnosti od roka otplate. Općina će kvartalno isplaćivati profitnu maržu u iznosu do 3 posto, što u konačnici znači da će se građani koristiti finansiranjima već od 0 posto.



SJEDNICA OPĆINSKOG ŠTABA CIVILNE ZAŠTITE NOVI GRAD SARAJEVO

Nastaviti ulaganja u trajnu regulaciju vodotoka



Štab civilne zaštite Općine Novi Grad Sarajevo, održao je 6. februara sjednicu na kojoj je razmatrana aktuelna situacija uzrokovana obilnim kišnim padavinama i naglim topljenjem snijega koji su prouzrokovali poplave u određenim dijelovima BiH.

Na području općine Novi Grad Sarajevo došlo je do rasta vodotoka, međutim nije bilo velikih poplava, izuzev u nekoliko objekata u Reljevu i Dobroševićima, gdje su ekipe Civilne zaštite i GSS-a na vrijeme intervenisale, kao i u Starom Hrasnom, gdje je došlo do urušavanja dijela individualnog stambenog objekta iz kojeg je sedmočlana porodica izmješetna u alternativni smještaj.

Konstatovano je kako su ulaganja u regulaciju riječnih korita Bosne, Miljacke, Dobrinje i Lepenice, te njihovih pritoka, rezultirala značajnim smanjenjem rizika od poplava. Zaključeno je da je neophodno nastaviti ulaganja u trajnu regulaciju ostatka vodotoka koji još nisu regulisani.

Agencija za vodno područje slivova Save već nekoliko godina realizira projekat regulacije korita Bosne. U saradnji sa Agencijom, Općina je u prošloj godini u cilju provođenja preventivnih mjera zaštite ljudi i materijalnih dobara od poplava, očistila i uredila veliki dio vodotoka Bosne na svom području.

Ostalo je još da se završi oko 3,5 kilometra regulacije Bosne nakon čega će se značajno smanjiti mogućnost poplava i u dijelu općine koji je još uvijek rizičan.

U prošloj godini također je očišćeno i uređeno 700 metara korita Miljacke, koje cijelom dužinom graniči sa općinom Ilidža, od Tržnog centra Wisa do mosta kod stočne pijace na Stupu, kao i vodotok Miljacke nizvodno od novoizgrađenog mosta u Halilovićima. Kontinuirano se radi i na regulaciji Lepeničkog potoka koji protiče

kroz naselje Zabrđe, a u ovoj godini radit će se regulacija neregulisanog dijela rijeke Dobrinje.

Pored navedenog, značajna sredstva su uložena i u rješavanje oborinskih voda u padinskim dijelovima Novog Grada prilikom rekonstrukcije saobraćajnica u ulici Adema Buće, Novopazarskoj, Vejsila Čurčića, Humačka ploča i drugim novogradskim ulicama.



Obustavljen proces obnove okolinske dozvole za deponiju Smiljevići

Federalno ministarstvo okoliša i turizma, na zahtjev Općine Novi Grad Sarajevo, odgodilo je izdavanje okolinske dozvole za deponiju Smiljevići dok se ne preispitaju uslovi iz vodne dozvole za tehnološke otpadne vode koje se iz deponije ispuštaju u otvoreni Lepenički potok koji protiče kroz gusto naseljeno područje Zabrđa i ulijevaju se u rijeku Bosnu.

Obzirom da se gradska deponija nalazi na području općine Novi Grad Sarajevo i da je prethodna okolinska dozvola za rad Regionalnog centra za upravljanjem otpadom Smiljevići istekla u junu prošle godine, Federalno ministarstvo okoliša i turizma zatražilo je od Općine mišljenje u vezi sa produženjem okolinske dozvole.

Uzimajući u obzir činjenicu da gradska deponija već duži vremenski period predstavlja problem stanovnicima okolnih naselja, jer se odlaganje gradskog otpada ne vrši na propisan način i u skladu sa ekološkim standardima, te da prečistač za procjedne vode već duži period nije u funkciji, Općina je zatražila da se preispita mogućnost obnove okolinske dozvole za rad Regionalnog centra za upravljanje otpadom Smiljevići, kao i izdavanje vodne saglasnosti od Agencije za vodno područje rijeke Save.

Prečistač procjednih voda nije u funkciji

Da prečistač voda iz tijela deponije nije u funkciji, te da su vode koje se ispuštaju iz deponije toksične i da kao takve negativno utiču na zagađenje okoline i zdravlje stanovnika okolnih naselja potvrdili su nalazi laboratorije za arhitektonsku fiziku i zaštitu okoliša „Dvokut pro“ d.o.o. koja je vršila ispitivanje kvaliteta procjednih voda iz tijela deponije u toku 2015., 2016. i 2017. godine.

Stanje na deponiji Smiljevići analizirao je i federalni inspektor zaštite okoliša koji je utvrdio da su pritužbe građana opravdane, jer postrojenje za prečišćavanje otpadnih - procjednih voda koje nastaju na deponiji nije u funkciji, te da nalazi pokazuju da su povećane emisije zagađujućih materija, kao i da se ne provodi monitoring plinova u procesu sagorijevanja otpada.

Ne radi ni sistem za otplinjavanje

Inspektor je također utvrdio da je sistem za otplinjavanje na deponiji uništen tako da plinovi direktno odlaze u vazduh i zagađuju okolinu, te da plinovi nastali sagorijevanjem otpada koji se trebaju kontrolisati u generatoru za proizvodnju električne energije ili na kontrolnoj baklji direktno odlaze u okolinu i ne mogu se kontrolisati. Tako da se ne zna koji sve plinovi zagađuju okolinu i kolika je njihova toksičnost, jer se oni mijenjaju i ovise o vrsti otpada.

Zbog neispunjavanja obaveza iz okolinske dozvole Općina Novi Grad Sarajevo zatražila je od nadležnih institucija da preispitaju stanje na deponiji, te je Federalno ministarstvo okoliša i turizma donijelo zaključak kojim se od Agencije za vodno područje rijeke Save traži preispitivanje uslova koji moraju biti ispoštovani za izdavanje vodne dozvole s obzirom da je izvršena demontaža postrojenja za prečišćavanje otpadnih voda i da se neprečišćene toksične otpadne vode ispuštaju u otvoreni vodotok Lepeničkog potoka.

Općina Novi Grad Sarajevo očekuje od preduzeća Rad koje upravlja deponijom i vrši naplatu odvoza otpada u Kantonu Sarajevo i nadležnog ministarstva prostornog uređenja, da kroz usvajanje budžeta Kantona Sarajevo za ovu godinu konačno počnu ulagati i rješavati problem deponije Smiljevići, kako bi se proces odlaganja otpada vršio u skladu sa ekološkim standardima.



Podrška porodicama sa troje i više djece: Po 500 KM za još 45 porodica



Općina Novi Grad Sarajevo nastavila je realizaciju projekta podrške porodicama koje dobiju blizance, treće, četvrto i svako naredno dijete. Ovakav vid podrške porodicama koje se odluče za više djece, ova lokalna zajednica realizira od 2015. godine s ciljem pružanja podrške natalitetu i osnaživanju porodice. Za tu namjenu iz ovogodišnjeg budžeta izdvojeno je 80.000 KM.

U zgradi Općine upriličen je prijem za 45 porodica, kojima su uručena rješenja za dodjelu novčane pomoći u iznosu od po 500 KM.

Rješenja su uručili općinski načelnik Semir Efendić, Tajib Delalić, pomoćnik općinskog

načelnika za boračka pitanja, rad, socijalna pitanja i zdravstvo i Elvir Kosovac, član Komisije za dodjelu ove vrste pomoći.

Uz čestitke sretnim roditeljima načelnik Efendić kazao je ovom prilikom da je to simbolični poklon od lokalne zajednice roditeljima koji se odluče za više djece. Istakao je da ova lokalna zajednica nastoji da u skladu sa svojim mogućnostima uradi više da ljudima u Novom Gradu život bude ugodniji. Naročito se velika pažnja posvećuje mlađoj populaciji, počev od rođenja, kroz školovanje, stipendiranje, izgradnju parkova, sportskih sadržaja, školskih objekata i sl.

Belma Bjelak - Bešlić, majka petero djece

istakla je da stanje u državi nije idealno, ali da je lijep osjećaj kada znate da neko misli o natalitetu, o mladim majkama, o budućnosti ove zemlje, barem na ovakav način.

Amra i Nedim Hamzić dobili su blizance, djevojčicu i dječaka. „Pomoć Općine Novi Grad od izuzetne je važnosti, želim da se zahvalim Načelniku, ali i općinskim uposlenicima koji su bili jako ljubazni u cijelom ovom procesu“, izjavio je Nedim. Među roditeljima koji su dobili treće dijete bila je i Enela Bilanović. „Prvi put primam ovakvu vrstu pomoći, treća je beba, tako da će novac biti utrošen za njene potrebe“, rekla je Enela.

Stotinu hiljada KM za sufinansiranje troškova vantjelesne oplodnje

Općina Novi Grad Sarajevo i ove će godine sufinansirati troškove postupka vantjelesne oplodnje za bračne parove koji nastoje postati roditelji. Za tu namjenu iz općinskog budžeta izdvojeno je 100.000 KM.

Projekat se realizira putem općinske Službe za boračka pitanja, rad, socijalna pitanja i zdravstvo, a u prošloj godini ovu vrstu pomoći dobio je 71 bračni par. Na taj način ova lokalna zajednica nastoji im olakšati da postanu roditelji.

„S obzirom na činjenicu da je veliki interes bračnih parova kojima je potrebna pomoć pri sufinansiranju medicinski potpomognute oplodnje, izdvojeno je duplo više sredstava u odnosu na prošlu godinu, kada smo tek započeli sa ovim projektom. Htjeli smo da vidimo kolika je potreba bračnih parova za ovom vrstom pomoći. Ove godine će stručna komisija izraditi pravilnik kojim će biti definisani kriteriji na osnovu kojih će se građani moći prijaviti. Pravilnikom će biti definisano ko

će imati pravo da aplicira, zatim starosna dob buduće majke, kao i ostali uslovi koje aplikanti trebaju ispuniti, a na zvaničnoj web stranici Općine će biti objavljena obavijest za građane da se prijave u nadležnu općinsku službu“, izjavio je Tajib Delalić, pomoćnik općinskog načelnika za boračka pitanja, rad, socijalna pitanja i zdravstvo.

Parovi koji se odluče dobiti potomstvo na ovaj način, za svaki pokušaj vještačke oplodnje moraju izdvojiti velika finansijska sredstva na ime plaćanja troškova postupka nadležnim zdravstvenim ustanovama.

Praksa većine zemalja u Evropskoj uniji je da država plaća pokušaje medicinski potpomognute oplodnje, ali kako u Bosni i Hercegovini još uvijek nije zakonski regulisano ovo pitanje, iako po nekim procjenama i statistikama u BiH postoji oko 80.000 bračnih parova koji imaju problem sa začećem, Općina Novi Grad finansijski će pomoći bračnim parovima koji žele postati roditelji.



Podrška nezaposlenim porodiljama

Za podršku nezaposlenim porodiljama koje primaju znatno manju porodiljsku naknadu u odnosu na zaposlene, Općina Novi Grad Sarajevo iz ovogodišnjeg je budžeta izdvojila 330.000 KM, tako da će svaka porodilja koja nije u radnom odnosu, a koja živi na području ove lokalne zajednice mjesečno primati po 50 KM.

Obzirom da zaposlene porodilje primaju mjesečnu naknadu u prosječnom iznosu od oko 406 KM, a nezaposlene 180 KM, Općina će za svaku nezaposlenu porodilju godinu dana mjesečno izdvajati dodatnih po 50 KM. Na taj način ova lokalna

zajednica nastoji smanjiti neujednačenost naknada za porodilje koje nisu u radnom odnosu dok se ovaj problem na nivou države trajno ne riješi.

Pored finansijske podrške nezaposlenim porodiljama, iz budžeta Općine Novi Grad Sarajevo osigurana su sredstva u iznosu od 90.000 KM za projekat pružanja podrške porodicama koje dobiju treće, četvrto i svako naredno dijete.

Dio je to mjera podrške porodici kao najvećem stubu društva i natalitetu koji je u općini Novi Grad iz godine u godinu u konstantnom porastu.





TI SLUČAJNI PROLAZNICI, NA TREN ZASTANI I NIKAD NE ZABORAVI
VELIKO DJELO OBICNOG ČOVJEKA

SAFET /SALKO/ ZAJKO
1959 -1993.

Dan nezavisnosti Bosne i Hercegovine, 1. mart u općini Novi Grad Sarajevo obilježen je sjećanjem na borce Armije RBiH koji su dali svoje živote za odbranu nezavisne i suverene države BiH. Položeno je cvijeće na Centralno spomen – obilježje šehidima i poginulim borcima Novog Grada.

Tim povodom delagacije Općine Novi Grad, boračkih udruženja, članovi porodica šehida i poginulih boraca, vijećnici u Općinskom vijeću Novi Grad Sarajevo, te delegacije političkih partija, okupili su se kod Centralnog spomen – obilježja ispred zgrade Općine, gdje su položili cvijeće i odali počast šehidima i poginulim borcima Novog Grada.

O značaju 1. marta, jednog od najznačajnijih datuma u historiji naše zemlje govorio je Tajib Delalić, pomoćnik općinskog načelnika za boračka pitanja, koji je podsjetio i na dešavanja tokom održavanja referenduma za nezavisnu i suverenu državu Bosnu

i Hercegovinu, ali i na događaj koji je uslijedio odmah nakon proglašenja nezavisnosti BiH, agresiju na našu zemlju.

Prisutnima se obratio i načelnik Općine Semir Efendić. On je kazao da je Centralno spomen - obilježje šehidima i poginulim borcima Novog Grada otkriveno na današnji dan 2017. godine, te da se na njemu nalaze imena oko 1.950 boraca koji su dali živote braneći općinu Novi Grad, ali da je i veliki broj civila i djece dao živote u Novom Gradu u vrijeme agresije na Republiku Bosnu i Hercegovinu.

Načelnik Efendić najavio je da će u narednom periodu biti osvijetljen i spomenik herojima odbrambeno – oslobodilačkog rata, rahmetli Safetu Hadžiću i Safetu Zajki, koji je ranije izgrađen pored Centralnog spomen – obilježja, tako da će u večernjim satima kao i ovaj koji je otvoren prije dvije godine, blistati u punom svom sjaju.

Cvijeće na Centralnom spomen – obilježju šehidima i poginulim borcima Novog Grada



Prvi međunarodni festival dječije pjesme „Djeca su vojska najjača“



Na Dan nezavisnosti naše zemlje, u multimedijalnom centru Općine održan je 1. Međunarodni festival dječije pjesme „Djeca su vojska najjača“. Pobjednica festivala je Ana Marija Vasiljević iz Istočnog Sarajeva (BiH) koja se mnogobrojnoj publici predstavila interpretacijom „Najbolje za nas“. Druga nagrada pripala je Sari Tešić iz Doboja (BiH) za interpretaciju pjesme „Hoću, neću“, dok je treća nagrada dodijeljena Elmi i Emiru Gec iz Goražda (BiH) za pjesmu „Uspavanka za mog brata“.

Stručni žiri u sastavu Gordana Arnautalić - predsjednica, Miroslav Miro Pilj – tekstopisac i novinar, te Aida Hadžiahmetović – profesorica muzičke kulture, odlučili su da nagrada za najbolji scenski nastup pripadne Zoji Hadner iz Maribora (Slovenija), nagrada za najbolju muziku Luki Bajoviću iz Nikšića (Crna Gora), dok je nagrada za najbolji aranžman dodijeljena Ani Bertić iz Zagreba (Hrvatska).

Nagradu za osvojeno prvo mjesto uručila je predsjednica žirija Gordana Arnautalić zajedno sa načelnikom Općine Novi Grad Sarajevo Semirom Efendićem, koji je u svom obraćanju izrazio zadovoljstvo što se festival održava u Novom Gradu i to na Dan nezavisnosti Bosne i Hercegovine. U revijalnom dijelu programa nastupila je Ilma Karahmet, nekadašnja članica hora „Princes krofne“, te Ema Burnazović i Irnes Divjan koji su na gitari izveli numeru popularne grupe Indexi. „Ti si mi bila u svemu naj“. Općina Novi Grad Sarajevo bila je ovogodišnji generalni pokrovitelj festivala, a u direktnom prenosu festival se mogao pratiti putem programa FACE TV.

DAN NEZAVISNOSTI BOSNE I HERCEGOVINE

Hiljade posjetilaca u Centru „Safet Zajko“



Lijep i sunčan praznični dan mnogobrojni građani Sarajeva iskoristili su za boravak u prelijepom ambijentu Centra „Safet Zajko“.

Više od šest hiljada odraslih građana sa djecom, u petak 1. marta, uživalo je u mnogobrojnim sadržajima koji su na raspolaganju kako najmlađim, tako i starijim posjetiocima najvećeg parka u gradu Sarajevu.

Prednost ovog parka u odnosu na ostala izletišta je njegova blizina, jer se iz većine dijelova grada može doći pješice ili biciklom, a od tramvajskog stajališta udaljen je svega nekoliko stotina metara.







*Svim muslimanima u Bosni i Hercegovini i dijaspori
upućujemo iskrene čestitke povodom nastupajućeg Bajrama*

Bajram Šerif Mubarek Olsun



Općina Novi Grad Sarajevo

ZA CIJELU PORODICU



**NAJNOVIJI SVJETSKI FILMSKI HITOVI
NA NAJSAVREMENIJOJ DIGITALNOJ OPREMI**

**VEČERNJE PROJEKCIJE ČETVRTKOM, PETKOM I SUBOTOM U 20 SATI
DJEČIJE PROJEKCIJE SUBOTOM U 13 SATI I NEDJELJOM U 13 I 17 SATI**

“DOM OSLOBODILACA ŽUČ”

*Mjesto sa kojeg svjedočimo herojsku prošlost i
gledamo u lijepu budućnost*

